

## Tibɔnyaan ti JǾNN ɲmee ti na

### *Unii u bi yin u ke Limɔboln na aabɔr*

<sup>1</sup> Uwumbɔr aah kaa nan kee naan dulnyaa na, ubaa nan bi, bi yin u ke Limɔboln. U nan bi Uwumbɔr chee, ki bi ke Uwumbɔr aah bi pu na.

<sup>2</sup> U nan bi Uwumbɔr chee ki nyan ni mpiin la.

<sup>3</sup> Uwumbɔr nan cha u naan tiwan mɔmɔk. Tiwan nibaa aa gur waa naan ni. <sup>4</sup> Uma le ye umɔfadaan. Limɔfal ngbaan tii binib nwiihn mu woln binimbil na. <sup>5</sup> Nwiihn ngbaan wolni mbɔmbɔɔn ni. Mbɔmbɔɔn aa junn nwiihn ngbaan.

<sup>6</sup> Uwumbɔr nan tun ni uja ubaa, bi nan yin u ke JǾnn. <sup>7</sup> U dan ke u nan tuk binib nwiihn ngbaan aabɔr, aan binib mɔmɔk ɲun waah len pu na, aan ki gaa nwiihn ngbaan. <sup>8</sup> JǾnn aa nan ye nwiihn ngbaan. U dan ke u nan tuk binib nwiihn ngbaan aabɔr la. <sup>9</sup> Nwiihn ngbaan le ye nwiihn bamɔnn, le ki dan dulnyaa wee ni ki nan woln binib mɔmɔk aanimbil.

<sup>10</sup> Baah yin u ke Limɔboln na nan naan dulnyaa, ki dan nan bi dulnyaa ni, le dulnyaa aanib aa bee u. <sup>11</sup> U dan udo aatin ni, le udo aatin ni yaab yii u.

<sup>12</sup> Binib bimɔk gaa u na, u tii bi nsan ke bi kpaln Uwumbɔr aabim. Bima le ye binib bi gaa u ki kii na. <sup>13</sup> Baah kpaln Uwumbɔr aabim na, naa ye ke binibɔm le ma bi Uwumbɔr aamaal ni, kaa ye

binibǾm aageehn pu. UwumbǾr le ma bi waamaal ponn ni.

<sup>14</sup> Baah yin u ke LimǾboln na nan kpaln unibǾn, ki nan bi tikaasisik ni. U gee binib chob, ki len ibamǾn baanja la. Le ti kan waah kpa mpǾǾn pu na. Waah ye UwumbǾr AajapǾnbaal na, u kpa mpǾǾn ke Ute UwumbǾr aah kpa pu na.

<sup>15</sup> JǾnn nan tuk binib waabǾr, ki len ke, “M nan tuk nimi ke unii u ga paan ni mpuwǾb na jer mi; baah kaa nan kee ma mi na, u nan bi. Uma le na.”

<sup>16</sup> UwumbǾr aah bi pu na, u mu bi kina le chob. Le ti mǾmǾk gaa waabimbin. U ņa UwumbǾr aanyoor ņa ti pu, ki beenin ņani timi tinyoor n-yoonn mǾmǾk. <sup>17</sup> UwumbǾr nan tuk Moses waakaal ke u di tuk timi. Yesu Kristo dan nan tuk timi UwumbǾr aah gee timi pu na, ki tuk timi tibǾr ti ye mbamǾn na. <sup>18</sup> Ubaa aa kee kan UwumbǾr. UjapǾnbaal Yesu Kristo, u bi ke Ute UwumbǾr aah bi pu na, ki bi u chee na, uma le tuk timi UwumbǾr aah bi pu na.

*JǾnn u nan muini binib nnyun ni na aah len pu na  
(Matiu 3.1-12; Mak 1.1-8; Luk 3.1-18)*

<sup>19</sup> Juu yaab bi nan bi Jerusalem aatiņ ni na nan tun ni UwumbǾr aatotoorb ni Liifai yaab JǾnn chee ke bi ti baa u, “Aa ye ņma?”

<sup>20</sup> Le JǾnn tuk bi mbamǾn, kaa gur tibaa. U nan tuk bi mbamǾn, ki len ke, “Maa ye Kristo u ga gaa binib lii na.”

<sup>21</sup> Le bi ki baa u ke, “Aa ye ņma? Aa ye Elaija aa?”

Le u bui bi, “Maa ye.”

Bi nan ki baa u ke, “Aa ye UwumbǾr aabǾnabr u bi bui ke u ga dan aa?”

Le u bui bi, “Aayii.”

<sup>22</sup> Nima pu na, bi nan ki baa u ke, “Aa ye ŋma? Tuk timi, aan ti ti tuk binib bi tun ni timi na. Aa ga len saabər ngbaan kinye?”

<sup>23</sup> U nan bui ke,  
“M ye nneel mu tar nteersakpiin ni na ke:

‘Toor Uwumbər aasan man.’ ”\*  
Uwumbər aabənabr Aisaya nan len kina la.

<sup>24</sup> Binib bi nan baa JǾnn mbaan ngbaan na nyan ni Farisii yaab chee la. <sup>25</sup> Le bi ki baa u ke, “Saah kaa ye Kristo u ga gaa timi lii na, kaa ye Elaija, kaa ye Uwumbər aabənabr ngbaan mu na, ba pu aa muini binib nnyun ni?”

<sup>26</sup> Le u bui bi, “Mma muini binib nnyun ni la. Ubaa mu bi nikaasisik ni. Nimi le aa nyi u. <sup>27</sup> U ye unii u paan ni mpuwəb na. Maa ŋeer ke m chuu gbiln waanaatak aañmin tii u.”

<sup>28</sup> Bi nan len təb chee tibər ngbaan Betani aatiŋ, ki bi JǾddann aaməɔdapuul, JǾnn aah muini binib nnyun ni nin chee na ni.

### *Unii u ye Uwumbər Aapihbo na*

<sup>29</sup> Ki woln kitaak le JǾnn kan Yesu choo u chee, le u bui ke, “Lik, Uwumbər Aapihbo u nyani dulnyaa ni aanib aatunwanbir na. <sup>30</sup> M nan len ke uja ubaa paan ni mpuwəb ki mu tee jer mi; baah kaa nan kee ma mi na, u nan bi. Uma le na. <sup>31</sup> Min mbaa aa nan nyi u; m muini binib nnyun ni ke nimi Israel yaab bee u la.”

<sup>32</sup> Le JǾnn jin seeraa ki tuk binib, “M kan Uwumbər Aafuur Nyaan nyan ni paacham ki naahn linanjel, ki nan təŋ u pu. <sup>33</sup> Min mbaa aa nan nyi u; Uwumbər u tun ni mi ke m nan muin

---

\* **1:23** : Lik Aisaya 40.3.

binib nnyun ni na, uma le bui mi ke m ga kan Waafuur Nyaan sunn ni ki nan tɔŋ uja ubaa pu, ke uma le ye unii u ga gbiin binib Uwumbɔr Aafuur Nyaan na. <sup>34</sup> Le m kan kina, ki ji seeraa ki tuk binib ke uma le ye Uwumbɔr Aajapɔɔn.”

*Binib bi puen ŋa Yesu aadidiliib na*

<sup>35</sup> Ki woln kitaak le Jonn ni waadidiliib bilee nan ki bi nima, <sup>36</sup> ki kan Yesu bi chuun nima. Jonn nan lik u, le ki len ke, “Lik, Uwumbɔr Aapihbo.”

<sup>37</sup> Jonn aadidiliib bilee ngbaan ŋun waah len pu na, le ki di paan Yesu pu. <sup>38</sup> Le Yesu fenn, ki kan bi paan ni u pu. Le u baa bi, “Ni ban ba?”

Le bi baa u, “Umɔmɔkr, aa koo la chee?”

<sup>39</sup> Le u bui bi, “Dan ki nan ti lik man.” Le bi dii u ki ti kan waah koo nin chee na. Ni nan ye tikur tinaa aayoonn la, le bi nan doon udo liyaadaal ngbaan.

<sup>40</sup> Bijab bilee bi nan ŋun Jonn aah len pu aan ki dii Yesu na, bi yin bi ponn ni ubaa ke Andru, u nan ye Simonn Piita aanaal na. <sup>41</sup> Libuul ngbaan ni le u buen ti kan ukpel Simonn, ki tuk u, “Ti kan Masiya u ga gaa timi lii na.” Masiya ni Kristo ye liyimbibaan la. <sup>42</sup> Le u di u dan Yesu chee.

Le Yesu lik Piita, ki bui u, “Bi yin si le ke Simonn, Jonn aajapɔɔn. Bi ga li gur yin si ke Siifas la.” Siifas aatataa le ye ke “litakpal.” Siifas ni Piita ye liyimbibaan la.

*Yesu aah yin Filip ni Natanael pu na*

<sup>43</sup> Ki woln kitaak le Yesu ban u buen Galilee aatiŋ ni, ki kan Filip, le ki bui u, “Li dii mi.”

<sup>44</sup> Filip do le ye Betseda aatiŋ ni. U ni Andru ni Piita nyan ni kitinbaan ni la. <sup>45</sup> Filip mu nan ti

kan Natanael le ki tuk u, “Ti kan unii u Moses ni Uwumbər aabənbətiib mu nan ηmee waabər Uwumbər aakaal aagbanj ni na. Uma le ye Josef aajapəən Yesu, u ye Nasaref aatinj aanii na.”

<sup>46</sup> Le Natanael baa u, “Tiwanyaan nibaa ga ηmaa nyan ni Nasaref aatinj ni ii?”

Le Filip bui u, “Dan nan lik.”

<sup>47</sup> Yesu nan waa Natanael choo u chee, le ki bui ke, “Lik, Israel aabobamənn. Nnyamən aa bi u ni.”

<sup>48</sup> Le Natanael baa u, “Aa ηa kinye ki ti nyi mi?”

Le Yesu bui u, “Saah ba bi likakaln taab na, m puen kan si, Filip aa kee yin si.”

<sup>49</sup> Le Natanael bui u, “Uməməkr, aa sil ye Uwumbər Aajapəən. Aa ye Israel yaab Aabərkpaan la.”

<sup>50</sup> Le Yesu baa u, “Maah bui ke m kan si likakaln taab na, nima le cha aa gaa mi ki kii ii? Aa ga kan lijnjiir aawan ki jer nimina. <sup>51</sup> M tuk nimi mbamən la, ni ga kan kitaapaak chuu piir, ki ga kan Uwumbər aatuuntiib cha paacham ki ki sunni, min Unibən Aabo pu.”

## 2

### *Yesu aah tun lijnjiir aatuln Kana aatinj ni pu na*

<sup>1</sup> Iwiin itaa daal le bi nan ji ubəndinn aajim Kana aatinj ki bi Galilee ni na. Yesu aana mu nan bi nima. <sup>2</sup> Bi nan yin Yesu ni waadidiliib ke bi mu dan nan ji. <sup>3</sup> Ni nan bi cha, le ηisubil aadaan na ti doo. Le Yesu aana bui u, “Baa ki kpa ndaan.”

<sup>4</sup> Le Yesu bui u, “Nna, ni ye maabər aa? Maayoonn aa kee fuu.”

<sup>5</sup> Le una bui bitutum na, “U yaa tuk nimi pu na kan, ni ηa kina.”

<sup>6</sup> Ikin sakpiin iloob nan si nima. Galon pi- itaa, bee moninko ga ŋmaa koo mubaa ponn ni. Juu yaab joo ikin ngbaan aanyun le finni bibaa, baakaal aah dii pu na. <sup>7</sup> Le Yesu tuk bitutum ngbaan, “Ban nnyun gbiin ikin ngbaan man.” Le bi ban nnyun gbiin i məmək paapaa. <sup>8</sup> Le u tuk bi ke bi kab ti tii njim aaninkpel. Le bi kab ti tii u. <sup>9</sup> Baah kab nnyun ngbaan ti tii u na, le mu kpaln ndaan. Le u wub lik, kaa nyi mu aah nyan nin chee na. Bitutum bi kab tii u na le nyi. Le u yin uja u din upii na, <sup>10</sup> ki nan bui u, “Binib məmək yaa ban bi tii ndaan kan, bi puen tii mu mə na la. Binib yaa nnyun ti bab kan, le bi nin tii bi ndaan mu kaa mə na. Si ma kan, saah tii bi mu puwəb na le mə ki jer saah puen tii bi mu na.”

<sup>11</sup> Nima le ye njan aajinjiir aatuln li Yesu tun na. U nan tun lituln ngbaan Kana aatiŋ ki bi Galilee ni na ni la. Le binib kan waah kpa Uwumbər aapəən pu na. Le waadidiliib gaa u ki kii.

<sup>12</sup> Ubəndinn aajim ngbaan aah doo na, le u ni una ni unaatiib ni waadidiliib buen Kapenaum aatiŋ ni, ki ti ŋa iwiin ilee nima.

*Yesu aah toor Uwumbər Aadichal pu na*

*(Matu 21.12-13; Mak 11.15-17; Luk 19.45-46)*

<sup>13</sup> Ni nan gur siib ke Juu yaab ji Lakr-jer aajim.\* Le Yesu buen Jerusalem aatiŋ ni <sup>14</sup> ki ti koo Uwumbər Aadichal ni, le ki kan binib ka nima ki kooh inaaja, ni ipiih, ni ŋinanjel. Binib bi kpelni ŋimombil na mu ka nima. <sup>15</sup> Le u di iŋmin ŋa

---

\* **2:13** : Israel yaab nan ji Lakr-jer aajim ke bi teer buyoonn Uwumbər nan nyan bi tinaagbiir ni, Ijipt aatiŋ ni na. Lik Nnyam 12.1-27.

linaalab, ki di jenn nyan inaja, ni ipiih ngbaan məmək lipaal, le ki labr binib bi kpelni njimobil na aateebul tiib chin, le njimobil yaa tɔb chee. <sup>16</sup> U nan tuk binib bi kooh njanjel na, “Di njanjel ngbaan nyan lipaal man. Ni taa ki di Nte Uwumbɔr Aadichal ɲa kinyan.” <sup>17</sup> Le waadidiliib teer ke ni njmee Uwumbɔr Aagban ni ke, “Uwumbɔr, maah neen saadichal pu na bi ke mmii le aah wu mponn ni na.” Le bi bee ke ni ye Yesu aabɔr la.

<sup>18</sup> Le Juu yaab baa u, “Aa ga ɲa ba aajinjiir aawan ki mək timi ke aa kpa nsan ke aa ɲa saah ɲani pu na?”

<sup>19</sup> Le u bui bi, “Gbaa wii Uwumbɔr Aadichal limina, aan m di iwiin itaa ki fiin li.”

<sup>20</sup> Le bi bui ke, “Njibin imonko ilee ni njiloob le bi nan di maa Uwumbɔr Aadichal ngbaan. Le aa bui ke aa ga di iwiin itaa fiin li ii?”

<sup>21</sup> Tɔ, u mu aa nan len Uwumbɔr Aadichal aabɔr la. Uma ubaa aawon le u nan len. <sup>22</sup> N-yoonn mu u fikr nkun ni na, le waadidiliib teer ke u nan len kina. Le bi pak waah len pu na, ni Uwumbɔr Aagban aah len pu na.

### *Yesu nyi binib məmək aabimbin*

<sup>23</sup> Yesu aah bi Jerusalem aatin ni, njim ngbaan aayoonn na, le kinipaak kan waah tun lijnjiir aatun pu na, le ki gaa u ki kii. <sup>24</sup> Uma aa tee gaa bi ki kii; <sup>25</sup> ba pu? u nyi binib məmək aabimbin. Waa ban ke ubaa nyaa u binib aabɔr. Uma ubaa nyi binib aasui ni aabɔr.

## 3

### *Yesu aah tuk Nikodemus pu na*

<sup>1</sup> Uja ubaa mu nan bi nima, bi nan yin u ke Nikodemus, u nan ye Farisii aanii la, ki ye Juu yaab aaninkpel ubaa. <sup>2</sup> Le u buen Yesu chee kinyeek ki nan bui u ke, “Uməməkr, ti nyi ke aa ye Uməməkr u nyan ni Uwumbər chee na la; ba pu? ubaa aan ηmaa tun lijnjiir aatun ke saah tun pu na, see Uwumbər bi u chee.”

<sup>3</sup> Le Yesu bui u, “M tuk si mbamən la, bi yaa kaa ma unii lelee kan, waan ηmaa koo Uwumbər aanaan ni.”

<sup>4</sup> Nikodemus nan baa u, “Unii yaa por kan, bi ga ηa kinye ki ki ma u lelee? U ga ηmaa gir koo una aaponn ni aan bi ki ma u uu?”

<sup>5</sup> Le Yesu bui u, “M tuk si mbamən la, Uwumbər Aafuur Nyaan yaa kaa ma unii lelee aan bi muin u nnyun ni kan, waan ηmaa koo Uwumbər aanaan ni. <sup>6</sup> Unibən aah ma u na ye unibən la. Uwumbər Aafuur Nyaan aah ma u na ye Uwumbər Aafuur Nyaan yoo la. <sup>7</sup> M tuk si la, see bi ki ma nimi lelee. Maah tuk si pu na, taa cha ni gar nimi. <sup>8</sup> Libuln daar cha laah ban nin chee na, le aa ηun laah kpa kifuuk pu na, kaa nyi laah nyan ni nin chee na, ki mu aa nyi laah cha nin chee na. Ni bi kina le ki tii unii umək Uwumbər Aafuur Nyaan ma u na.”

<sup>9</sup> Le Nikodemus baa u, “Ni ga ηa kinye aan ki ηa kina?”

<sup>10</sup> Le Yesu baa u, “Aa ye unii u mək Israel yaab Uwumbər aakaal na, le kaa bee maah len pu na aatataa aa? <sup>11</sup> M tuk si mbamən la, ti len taah nyi pu na la, ki tuk binib tinimbil aah kan pu na, le naa gaa taah len pu na. <sup>12</sup> M tuk nimi dulnyaa wee ni aabər, le naa pak ti, ka m yaa tuk nimi paacham aabər kan, ni ga ηa kinye ki pak ti? <sup>13</sup> Ubaa aa



kee buen paacham see min UnibǾn Aabo u [bi paacham ki] nyan ni paacham na.

<sup>14</sup> “Moses aah nan di uwaa fin ndǾ pu ki di chǾn paacham nteersakpiin ni pu na, see bi di min UnibǾn Aabo mu chǾn paacham kina, <sup>15</sup> aan unii umǾk gaa mi ki kii na li kpa limǾfal li kaa kpa ndoon na.”

<sup>16</sup> UwumbǾr aah gee dulnyaa aanib sakpen pu na, nima le u di UjapǾnbaal tii ni ke unii umǾk gaa u ki kii na taa kpo, u li kpa limǾfal li kaa kpa ndoon na. <sup>17</sup> UwumbǾr tun ni UjapǾn dulnyaa ni. Waa tun ni u ke u nan ji dulnyaa wee ni aanib tibǾr, u tun ni u ke u gaa bi lii la.

<sup>18</sup> Unii umǾk gaa u ki kii na, UwumbǾr aa len ke waabǾr bii. Unii umǾk kaa gaa u ki kii na, UwumbǾr len ke waabǾr bii a. Waah kaa gaa UwumbǾr AajapǾnbaal ki kii na, nima le cha UwumbǾr len ke waabǾr bii. <sup>19</sup> UwumbǾr aah ga ji bi tibǾr pu na le ye ke nwiihn dan dulnyaa ni, le binib yii mu, le ki gee mbǾmbǾn ni; ba pu? baatuln aa nǾn. <sup>20</sup> Unii umǾk tun lituln li kaa nǾn na, u nan nwiihn la, kaan dan nwiihn ponn ni, binib taa kan waah tun pu na. <sup>21</sup> Unii umǾk tun lituln li nǾn na kan, u choo nwiihn ponn ni ke unii mǾmǾk nan kan waah tun pu na, ke u tun UwumbǾr aah gee pu na la.

### *JǾnn aah len Yesu aabǾr pu na*

<sup>22</sup> Yesu aah len tibǾr timina ki ti doo na, le u ni waadidiliib buen Judea aatiŋ ni, ki ti bi nima ki muini binib nnyun ni. <sup>23</sup> JǾnn mu nan bi muini binib nnyun ni. U nan bi Enonn aatiŋ ni, Salim aatiŋ chee, nnyun aah wiir nima chee pu na. Le

binib choo u chee, le u muini bi nnyun ni. <sup>24</sup> Baa nan kee chuu u ŋa kiyondiik ni n-yoonn ngbaan.

<sup>25</sup> Le Jŏnn aadidiliib ni Juu aanii ubaa nan kpak tɔb kinikpakpak, baah muini binib nnyun ni pu na pu. <sup>26</sup> Le bi dan Jŏnn chee ki nan tuk u, “Umɔmɔkr, lik, unii u nan bi aa chee Jɔɔdann aamɔɔdapuul na, aan aa nan tuk binib waabɔr na, u mu gur bi muini binib nnyun ni, le binib mɔmɔk gur chaa u chee.”

<sup>27</sup> Le Jŏnn bui bi, “Ubaa aan ŋmaa ŋa nibaa see Uwumbɔr le tii u. <sup>28</sup> Nimi nibaa ŋun m len ke maa ye Kristo u ga gaa binib lii na; Uwumbɔr tun ni mi ke m li ye Kristo aasaloln ki toor nsan tii u. <sup>29</sup> Usapɔɔn yaa kun uchal do kan, uchal le yeh u. Le uchal aajɔ u si u chee ki ŋun waaneel na kpa mpopiin pam. Nima le cha m mu kpa mpopiin mbamɔm.\* <sup>30</sup> Ni ŋan ke uma Kristo li moo kani mpɔɔn, le m ma gur.”

### *Unii u nyan ni paacham na aabɔr*

<sup>31</sup> Uma u nyan ni paacham na le jer binib mɔmɔk. Unii u nyan ni dulnyaa ni na ye dulnyaa ni aanii la, ki len dulnyaa ni aabɔr la. Yesu u nyan ni paacham na le jer binib mɔmɔk. <sup>32</sup> U tuk binib waah kan pu na, ni waah ŋun pu na. Ubaa mu aa gaa waah len pu na. <sup>33</sup> Unii umɔk gaa waah len pu na, u kii ke Uwumbɔr ye mbamɔndaan la. <sup>34</sup> Yesu u Uwumbɔr tun ni u na le len uma Uwumbɔr aabɔr; ba pu? Uwumbɔr di Waafuur Nyaan mu kaa kpa ŋŋaŋ na gbiin u. <sup>35</sup> Uwumbɔr gee Ujapɔɔn Yesu ki di mpɔɔn mɔmɔk ŋa uŋaal ni. <sup>36</sup> Unii umɔk gaa Uwumbɔr Aajapɔɔn ki kii na le kpa limɔfal li

\* **3:29** : Uja ni usapɔɔn ngbaan si Yesu ni waanib aasisii la, Jŏnn le ye uɔɔ.

kaa kpa ndoon na. Unii umək kaa kii Uwumbər Aajapəən aaməb na, waan kan liməfal li kaa kpa ndoon na. Uwumbər gee liŋuul u pu n-yoonn mu kaa kpa ndoon na.

## 4

### *Yesu aah tuk Samaria aatiŋ aapii pu na*

<sup>1</sup> Le Farisii yaab ŋun ke Yesu ŋa binib waadidiliib ki muin bi nnyun ni ki jer Jonn aah ŋa pu na. <sup>2</sup> Yesu ubaa mu aa muin binib nnyun ni. Waadidiliib na le muini bi. <sup>3</sup> Tɔ, waah bee ke Farisii yaab ŋun kina na, le u nyan Judea aatiŋ ni, ki ki gir buen Galilee aatiŋ ni. <sup>4</sup> Waah cha na, le u neen ke u dii Samaria\* aatiŋ ni.

<sup>5</sup> Le u ti fuu Samaria aatiŋ kibaa ni, bi yin ki ke Saika. Bukpaab bu Jakob nan di tii ujaɓəən Josef na aa daa nima chee. <sup>6</sup> Jakob aanyunbun mu bi nima chee. Le Yesu aah chuun na, u bak a. Nima le u kal nnyunbun ngbaan aaməgbeln pu. Nwiin nan bi kaasisik ni.

<sup>7</sup> Le Samaria aapii ubaa dan u nan lu nnyun. Le Yesu bui u, “Pu mi nnyun m nyu.” <sup>8</sup> Waadidiliib na puun buen kitiŋ ponn ni bi ti daa tijikaar.

<sup>9</sup> Le upii ngbaan bui u, “Aa ye Juu aanii la, m mu ye Samaria aapii la. Ba pu aa bui mi ke m tii si nnyun?” Juu yaab ni Samaria yaab aa kpaani tɔb chee, nima le cha u len kina.

<sup>10</sup> Le Yesu bui u, “Aa yaa ba nyi Uwumbər aah tii binib pu na, ki yaa ba nyi unii u mee si nnyun na kan, aa ba ga bui u ke u tii si nnyun mu ye liməfal aanyun na, le u ba ga tii si.”

---

\* **4:4** : Samaria yaab ni Juu yaab aakaasisik ni aa nan mɔ.

11 Le upii ngbaan bui u, “Maaninkpel, saa kpa goomaa, nnyunbun ngbaan nyoo, aa ga kan limɔfal aanyun ngbaan la chee? 12 Tiyaaja Jakob, ni ujaarɔtiib, ni waawakor nan nyu nnyunbun ngbaan ni la. Uma le nan tii timi nnyunbun ngbaan. Aa jer uma la aa?”

13 Le Yesu bui u, “Unii umək nyu nnyun mue na, nnyunyuu ga ki chuu u. 14 Unii umək nyun maah ga tii u nnyun mu na, nnyunyuu aan ki chuu u. Maah ga tii u nnyun mu na, mu ga li ye nnyunbun mu bu u ponn ni kaan foor na, mu ga tii u limɔfal li kaa kpa ndoon na.”

15 Le upii ngbaan bui u, “Maaninkpel, tii mi nnyun ngbaan aan nnyunyuu taa ki chuu mi, aan m taa ki dan do nan lu nnyun.”

16 Le Yesu bui u, “Li cha ki ti yin ni aachal, aan ki gir ni.”

17 Le u bui u, “Maa kpa chal.”

Le Yesu bui u, “Saah len ke saa kpa chal na, ni ye mbamɔn la. 18 Aa nan kpa chatiib biɲmu la. Saah bi uja u chee dandana na aachal aa ye u. Saah len pu na, aa len mbamɔn la.”

19 Le upii ngbaan bui u, “Maaninkpel, m bee ke aa ye Uwumbɔr aabɔnabr la. 20 Timi Samaria yaab aayaajatiib nan dooni Uwumbɔr lijoor limina paab la, le nimi Juu yaab ma bui ke ni ɲan ke binib li dooni Uwumbɔr Jerusalem aatiɲ ni.”

21 Le Yesu bui u, “Upii, pakn maah ga len pu na, n-yoonn choo, binib aan nan ki doon Tite Uwumbɔr lijoor limina paab, ki mu aan ki doon u Jerusalem aatiɲ ni. 22 Nimi Samaria yaab dooni Uwumbɔr u naa nyi u na. Timi Juu yaab ma dooni

Uwumbər u ti nyi u na la. Unii u ga gaa dulnyaa ni aanib lii na nyan ni Juu yaab aakaasisik ni la. <sup>23</sup> N-yoonn choo, ki mu fuu ni a, le binib bi dooni Tite Uwumbər mbaməm na ga li dooni u bisui ni, Waafuur Nyaan aapəən pu. Uwumbər ban binib kina aaboln le bi li dooni u. <sup>24</sup> Uwumbər ye kifuurk la. Le binib bimək dooni u na li dooni u bisui ni, Waafuur Nyaan aapəən pu.”

<sup>25</sup> Le upii ngbaan bui u, “M nyi ke Masiya† u bi yin u ke Kristo na ga dan. U yaa fuu ni kan, u ga nan tuk timi tiwan məmək aah bi pu na.”

<sup>26</sup> Le Yesu bui u, “Min u bi len aa chee na, m ye uma.”

<sup>27</sup> Libuul ngbaan ni le waadidiliib fuu ni. Baah nan mui u ni upii bi len təb chee tibər na,‡ le ni gar bi pam; ubaa mu aa baa upii ngbaan, “Aa ban ba?” kaa baa Yesu mu, “Ba pu aa len u chee tibər?”

<sup>28</sup> Le upii ngbaan di waanyunbuul siin, ki buen kitin ni, ki ti bui binib ke, <sup>29</sup> “Dan nan lik man uja u tuk mi maah nan tun pu na məmək na. Uja ngbaan ga li ye Kristo u ga gaa timi lii na la aa?” <sup>30</sup> Le bi nyan kitin ni ki cha u chee.

<sup>31</sup> Upii ngbaan aah gir buen kitin ni na, le Yesu aadidiliib nan bi gar ni u ke, “Uməmək, ji tijikaar.”

<sup>32</sup> Le u bui bi, “M kpa tijikaar ti naa nyi tibər na m ji.”

<sup>33</sup> Waah len kina na le waadidiliib baa təb, “Ubaa le taanin joo ni tijikaar nan tii u uu?”

---

† **4:25** : Hiibru aaliin ni, bi yin u ke Masiya, le ki yin u ke Kristo, Griik aaliin ni. Naatataa le ye ke “Unii u ga gaa binib lii na.”

‡ **4:27** : Juu yaab aabimbin aah nan bi pu na, uja ni upii u kaa ye upuu na aan gbaa təb chee tibər.

<sup>34</sup> Le u bui bi, “Maajikaar le ye ke m ɲa Uwumbɔr u tun ni mi na aah gee pu na, ki tun waatuln doo.

<sup>35</sup> Ni ɲakl liyataɲakl ke, ‘Ni gur inɲmal inaa le ni ɲeer lijikaacheel.’ Tɔ, m tuk nimi la, jaar lik man, tijikaar ɲeer licheel a. <sup>36</sup> Unii u chee na ga kan tipar, ki ga di binib koon Uwumbɔr aanaan ni, aan bi kan limɔfal li kaa kpa ndoon na. Nima le ga cha unii u bun na, ni unii u chee na mɔmɔk li kpa mpopiin. <sup>37</sup> Bi len ke ‘Ubaa bun, le uken chee,’ le ti gbii; <sup>38</sup> ba pu? m tun nimi, ni ti chee tijikaar ti naa tun taatuln na. Biken aatuln pu, le ni jin tinyoor.”

<sup>39</sup> Le upii ngbaan tuk Samaria yaab bi bi kitiɲ ngbaan ni na ke Yesu tuk u waah nan tun pu na mɔmɔk, nima le cha bi ponn ni pam gaa Yesu ki kii. <sup>40</sup> Le bi dan u chee, ki ganj u ke u li bi bi chee. Le u ɲa bi chee iwiin ilee.

<sup>41</sup> Le binib bi gaa u ki kii waaliin pu na wiir ki jer binib bi gaa u ki kii upii ngbaan aaliin pu na.

<sup>42</sup> Le bi tuk upii ngbaan, “Ti gaa u ki kii la; naa ki ye saaliin pu le ti gaa u ki kii. Timi tibaa ɲun waah len pu na, ki bee ke u sil ye Kristo u ga gaa dulnyaa ni aanib lii na.”

*Yesu aah cha uninkpel ubaa aabo pɔɔk pu na*

<sup>43</sup> Yesu aah bi bi chee iwiin ilee na, le u nyan nima ki buen Galilee aatiɲ ni. <sup>44</sup> Uma ubaa le len ke Uwumbɔr aabɔnabr ma kan, udo aatiɲ ni aanib aan nyunj u. <sup>45</sup> Waah ti fuu Galilee aatiɲ ni na le bi gaa u; ba pu? bi mu nan buen Jerusalem bi ti ji njim ngbaan, ki kan waah tun lijinjiiir aatun ɲimɔk na, njim ngbaan yoonn.

<sup>46</sup> Le u ki dan Galilee aatiɲ kibaa ni, bi yin ki ke Kana, waah nan cha nnyun kpaln ndaan nin chee

na. Le ubarkpaan aakpambalb ponn ni ubaa bi Kapenaum aatinj ni. Le u japoon bun. <sup>47</sup> Uninkpel ngbaan nan n̄un ke Yesu nyan ni Judea aatinj ni ki bi Galilee aatinj ni. Le u buen Yesu chee, le ki ti ganj u ke u dan udo, ki nan cha u japoon u ban u kpo na aaween soj. <sup>48</sup> Le Yesu bui u, “Ni yaa kaa kan lijnjiir aatun kan, naan gaa mi ki kii.”

<sup>49</sup> Le uninkpel ngbaan bui u, “Ndindaan, dan mala. Aa yaa taan kan, aa ga nan mui maabo kpo a.”

<sup>50</sup> Le Yesu bui u, “Li dii saasan. Aajapoon kan limofal la.”

Le uja ngbaan pak Yesu aah len pu na, ki labr kun. <sup>51</sup> Waah paan ni nsan pu na le waatutum tooh ni u nsan ni ki nan bui u ke waabo na kan limofal a.

<sup>52</sup> Le u baa bi, “Bayoonn ni soj?” Le bi bui u, “Fen na, nwiin aah kpar buyoonn na, le uwon soj.” <sup>53</sup> Le uja ngbaan mu bee ke n-yoonn mu Yesu fe bui u ke u japoon kan limofal na le na. Kina pu le cha u ni waachiln ni aanib momok gaa Yesu ki kii.

<sup>54</sup> Nimina le nan na lijnjiir aatuln leler le u tun waah nyan ni Judea aatinj ni ki bi Galilee ni na.

## 5

### *Yesu aah cha uja pak nnyunbun chee pu na*

<sup>1</sup> Nee aapuwob le Juu yaab aajim mubaa nan bi. Le Yesu buen Jerusalem. <sup>2</sup> Jerusalem ponn ni le nnyunbun mu waa na bi ipiih aabisamob chee. Juu yaab aaliin ponn ni bi yin nnyunbun ngbaan ke Betsata. Tinaamboln tinmu nan si gob nnyunbun ngbaan. <sup>3</sup> Le bibum wiir ki do tinaamboln ngbaan ponn ni. Bi nan ye bijoom, ni biwob, ni

binib bi aawon faan na, [ki dɔ kii buyoonn nnyun ga fii yey na; <sup>4</sup> ba pu? nwiin nwiin le Uwumbɔr aatuun ubaa sunn ni ki nan koo nnyunbun ni, ki ti kur nnyun. Bundaln u yaa ti dan nan kur nnyun na kan, ubun u puen koo nnyun ni na kan, le u pɔɔk.] <sup>5</sup> Le uja ubaa bi nima ki bun ŋibin piitaa ni ŋiniin. <sup>6</sup> Le Yesu kan u, u dɔ nima, le ki bee ke u bun ni yunn. Le u baa u, “Aa ban aa pɔɔk aa?”

<sup>7</sup> Le u bui u, “Ndindaan, nnyun yaa fii yey kan, maa kpa unii u ga di mi koon nnyun ni na. M yaa ban m koo nnyun ni kan, le ubaa puen mi ki koo.”

<sup>8</sup> Le Yesu bui u, “Fiin ki yoor saawandookaan ki li chuun.” <sup>9</sup> Libuul ngbaan ni le u pɔɔk, le ki yoor waawandookaan, ki bi chuun.

Liyaadaal ngbaan nan ye Juu yaab aakpaakool daal la. <sup>10</sup> Nima pu le Juu yaab bui uja u pɔɔk na, “Din ye likpaakool la. Saah yoor saawandookaan na, aa bii timi aakaal.”

<sup>11</sup> Le u bui bi, “Uja u tii mi laafee na, uma le bui mi ke m yoor maawandookaan ki li chuun.”

<sup>12</sup> Le bi baa u, “Ŋma ye u bui si ke aa yoor saawandookaan ki li joo chuun na?”

<sup>13</sup> Le uja u pɔɔk na aa nyi unii u ye na; ni ba ye kinipaak ni la, le Yesu nyan nima ki buen.

<sup>14</sup> Nee aapuwɔb le Yesu kan u Uwumbɔr Aadichal ni le ki bui u, “Lik, aa pɔɔk a. Aa taa ki tun titunwanbir aan ki taa ki kan falaa u jer saah kan u na.”

<sup>15</sup> Le uja ngbaan buen ti tuk Juu yaab ke Yesu le ye uja u cha u pɔɔk na. <sup>16</sup> Nima pu le Juu yaab nan muk Yesu, ke ba ŋa u tii ubun laafee likpaakool daal. <sup>17</sup> Le Yesu bui bi, “Nte Uwumbɔr beenin tun lituln le ki nan saa dandana wee, le m mu bi tun.”



18 Waah len kina na, le Juu yaab moo ban bi ku u; ba pu? naa ye waah bii likpaakool daal aakoobil na baanja, u yin Uwumbər ke Ute. Waah yin u ke Ute na, u di ubaa ɲaɲ Uwumbər la.

*Yesu aah kpa tininkpir pu na*

19 Le Yesu bui bi, “M tuk nimi mbamən la, min Uwumbər Aajapəən aa ɲmaa ɲa nibaa mbaa pu. Maah kan Nte Uwumbər aah ɲani pu na, le m ɲani; waah ɲani pu na, le min Ujapəən mu ɲani kina; 20 ba pu? Nte Uwumbər gee mi Ujapəən, ki mək mi waah tun pu na məmək. U ga mək mi lituln li jer limina na ke m tun, aan ni moo gar nimi. 21 Nte Uwumbər aah fikr binib bi kpo na nkun ni, ki tii bi liməfal pu na, kina le min Ujapəən mu tii maah lee bi na liməfal. 22 Nte Uwumbər aa ji unii ubaa tibər, u cha min Ujapəən le ji binib məmək aabər, 23 aan binib məmək nyuɲ min Ujapəən ke baah nyuɲ Nte Uwumbər pu na. Unii umək kaa nyuɲ min Uwumbər Aajapəən na, waa nyuɲ Uwumbər u tun ni mi na le na.

24 “M tuk nimi mbamən la, unii umək ɲun maaliin ki gaa Uwumbər u tun ni mi na ki kii na, u kpa liməfal li kaa kpa ndoon na. Uwumbər aan ji u tibər. U nyan nkun ni, ki kan liməfal a. 25 M tuk nimi mbamən la, n-yoonn choo, ki mu fuu ni a, le binib bi kpo na ga ɲun min Uwumbər Aajapəən aaneel pu, le bi ɲun na ga kan liməfal. 26 Nte Uwumbər ye Uməfadaan la, le ki ɲa min Ujapəən mu Uməfadaan, 27 ki tii mi mpəən ke m ji binib tibər; ba pu? m ye Unibən Aabo la. 28 Ni taa cha nimina gar nimi man. N-yoonn choo, le binib bimək bi ɲikaakul ni na ga ɲun maaneel pu,

<sup>29</sup> ki nyan ni. Binib bi nan tun lituln li n̄an dulnyaa wee ni na ga fikr ki kan limɔfal li kaa kpa ndoon na. Binib bi nan tun lituln li kaa n̄an na ga fikr ki kan ntafadaan.”

*Tiwan ni mɔk ke Yesu sil nyan ni Uwumbɔr chee na*

<sup>30</sup> “Maa n̄maa n̄a nibaa mbaa pu. M ji binib tibɔr, Uwumbɔr aah tuk mi pu na la. Maah ji bi tibɔr pu na, ni n̄an; ba pu? maa ban maageehn, m ban Uwumbɔr u tun ni mi na aageehn la.

<sup>31</sup> “M yaa tuk nimi maah ye pu na kan, ni ga len ke taa gbii. <sup>32</sup> Ubaa mu bi ki len maah ye pu na. Uma le ye Uwumbɔr. M nyi ke waah len pu na, ti gbii. <sup>33</sup> Ni nan tun binib Jonn chee. U mu nan tuk nimi maah ye pu na, ki tuk nimi mbamɔn. <sup>34</sup> Naa ye ke m ban unibɔn aaseeraa la. M ban ke ni n̄mar, nima le cha m teer nimi Jonn aah len pu na. <sup>35</sup> Jonn nan bi ke karyaa u gaal mmii ki wiin na la. Ni nan gee ke ni li bi waawiin ni, ni yunn siib, ki nan kpa mpopiin. <sup>36</sup> Jonn nan tuk nimi maah ye pu na. Tiwan nibaa mu bi ki ji seeraa ki tii mi, ki jer Jonn aaseeraa. Nte Uwumbɔr tii mi lituln ke m tun li ki doo. Lima le m tun. Lituln ngbaan le ji seeraa ki tii mi ke Nte Uwumbɔr tun ni mi dulnyaa wee ni. <sup>37</sup> Nte Uwumbɔr u tun ni mi na, uma ubaa le ji seeraa ki tii mi. Naa kee n̄un waaneel, ki mu aa kee kan unibil wɔb. <sup>38</sup> Waaliin aa bi nisui ni; u tun ni mi ni chee, le naa pak maah len pu na; nima le mɔk ke waaliin aa bi nisui ni. <sup>39</sup> Ni karni Uwumbɔr Aagban ke ni bee kaah len pu na; ba pu? ni dak ke ni ga kan limɔfal li kaa kpa ndoon na ki ponn ni. Kigban ngbaan len maabɔr le na. <sup>40</sup> Le naa kii ke ni dan m chee, aan ki kan limɔfal.

41 “U nyuḡni mi na aa ye unibɔn. 42 M nyi nimi ke naa gee Uwumbɔr. 43 M dan ni chee Nte Uwumbɔr aayimbil pu, le naa gaa mi. Ubaa mu yaa dan ni chee uma ubaa aayimbil pu kan, ni ga gaa uma. 44 Ni nyuḡni tɔb la, kaa ban ke Uwumbɔr, u ye Uwumbɔr baan na, li nyuḡni nimi. Ni ga ḡa kinye aan ki gaa mi ki kii? 45 Ni taa dak ke m ga bii nimi Nte Uwumbɔr chee. Ubaa le bi ki ga bii nimi. Uma le ye Moses. Ni mak ke ni ga ḡmar waamɔbon pu. 46 Tɔ, ni yaa ba pak waamɔbon kan, ni ba ga pak m mu aaliin; ba pu? maabɔr le u ḡmee. 47 Ni yaa kaa pak waah ḡmee pu na kan, ni ga ḡa kinye ki pak maah len pu na?”

## 6

*Yesu aah kpiin binib ḡichur ḡiḡmu pu na  
(Matiu 14.13-21; Mak 6.30-44; Luk 9.10-17)*

1 Yesu aah len kina ki ti doo na, le u puur Galilee Aanyusakpem. Bi yin mu ke Galilee, le ki ki yin mu ke Tiberias. 2 Kinipaak nan dii u. Bi kan waah tun lijnjiir aatun ki tii bibum laafee pu na, nima le cha bi dii u. 3 Le u jon lijool paab, le u ni waadidiliib kal kitin nima. 4 Ni nan gur siib Juu yaab ji njim mu bi yin mu ke Laker-ger aajim na.\* 5 Le Yesu yaar lik, le ki kan kinipaak choo u chee. Le u baa Filip, “Ti ga daa tijikaar la chee aan binib ngbaan ji?” 6 Uma ubaa nyi waah ga ḡa pu na, le ki baa Filip kina ke u lik ke u ga len kinye.

7 Le Filip bui u, “Ti yaa di iwiin ikui ilee aapal daa tijikaar kan, taan fuu bi mɔmɔk kan siisii ki ji.”

---

\* **6:4** : Israel yaab nan ji Laker-ger aajim ke bi teer buyoonn Uwumbɔr nan nyan bi tinaagbiir ni, Ijpt aatin ni na. Lik Nnyam 12.1-27.

<sup>8</sup> Le waadidiliib ponn ni ubaa, bi yin u ke Andru aan u ye Simonn Piita aanaal na, bui u ke, <sup>9</sup> “Unachipɔnbo ubaa bi do ki joo ɲiboroboro kpin ɲiɲmu ni njanbim mulee; binib ngbaan mu aah wiir pu na, nimina ga ɲa bi ba?”

<sup>10</sup> Le Yesu bui bi, “Cha binib ngbaan kal kitɲ.” Timosɔnn nan wiir nima chee. Le bi kal kitɲ. Bijab ga nan li fuu ɲichur ɲiɲmu. <sup>11</sup> U nan yoor ɲiboroboro kpin ɲiɲmu ngbaan, le ki doon Uwumbɔr, ki geei geei ki tii binib bi ka kitɲ na, le ki geei geei njanbim mulee na mu, ki tii bi, bimɔk aah ban pu na. <sup>12</sup> Le bi mɔmɔk ɲman ki ti bab. Baah ɲman ki ti bab na, le u bui waadidiliib, “Kuun ni baah ɲman gur ni na man, nibaa taa bii.” <sup>13</sup> Baah ɲman ɲiboroboro kpin ɲiɲmu ki ti bab ki gur ni na, bi nan kuun ni gbiin tibɔkur kipiik ni tilee la.

<sup>14</sup> Binib ngbaan aah kan Yesu aah tun lijinjiir aatuln ngbaan pu na, le bi bui ke, “Uja wee sil ye Uwumbɔr aabɔnabr u bi nan len ke u ga dan dulnyaa wee ni na la.” <sup>15</sup> Yesu nan bee ke bi ban bi chuu u mpɔɔn ki di ɲa baabɔr. Nima pu le u nyan bi chee, ki ki buen lijool ngbaan paab ubaa.

*Yesu aah chuun nnyun pu pu na  
(Matu 14.22-33; Mak 6.45-52)*

<sup>16</sup> Kijook aah joor na, le waadidiliib buen nnyusakpem ni, <sup>17</sup> ki ti koo bunɔb ni, ki cha nnyusakpem aadapuul, Kapenaum aatiɲ ni. Waa nan kee fuu bi chee, le ni mue. <sup>18</sup> Le libuln daar ki pɔɔ sakpen, le tinyunkpenn feeni. <sup>19</sup> Baah ɲaal bunɔb ki pii mal bitaa, bee binaa na, le bi kan u chuun nnyun pu ki choo, ki duun ni baanɔb chee. Le ijawaan chuu bi. <sup>20</sup> Le u bui bi, “Min ye. Taa san

ijawaan man.” <sup>21</sup> Waah len kina na, le bi nan kpa mpopiin ki yoor u ŋa buŋɔb na ni. Libuul ngbaan ni le bi fuu baah cha kitin ki ni na.

*Kinipaak ngbaan aah ban Yesu pu na*

<sup>22</sup> Ki woln kitaak le kinipaak ki gur nnyusakpem aadapuul na kan ke buŋɔb bubaa aa ki bi bi chee nima, ki nyi ke buŋɔb bubaa baanja le fe bi nima, ki nyi ke Yesu aa fe koo buŋɔb ngbaan ni, waa-didiliib chee, bi fe buen bibaa la. <sup>23</sup> Le inɔi nyan ni Tiberias aatin ni, ki duun ni nin chee Yesu fe doon Uwumbɔr ki tii bi tijikaar bi ji na. <sup>24</sup> Kinipaak ngbaan kan ke Yesu ni waadidiliib aa ki bi. Nima pu le bi koo inɔi ni, ki cha nnyusakpem aadapuul, Kapenaum aatin ni, bi ti ban Yesu.

*Yesu le ye limɔfal aajikaar*

<sup>25</sup> Le bi ti kan u nnyusakpem aadapuul, le ki baa u ke, “Umɔmɔkr, aa fuu ni do bayoonn?”

<sup>26</sup> Le u bui bi, “M tuk nimi mbamɔn la, naah fe jin tijikaar bab na, nima le ni ban mi, naa ye ke ni bee lijnjiir aatun ngbaan aatataa la. <sup>27</sup> Ni taa cha ninimbil li man tijikaar ti ga bii na pu. Ninimbil li man tijikaar ti ga tii nimi limɔfal li kaa kpa ndoon na pu. Min Unibɔn Aabo le ga tii nimi tijikaar ngbaan; ba pu? min Unibɔn Aabo le Nte Uwumbɔr mɔk ke m ye Waanii.”

<sup>28</sup> Le bi baa u, “Ti ga ŋa kinye aan ki tun Uwumbɔr aatuln waah ban pu na?”

<sup>29</sup> Le Yesu bui bi, “Ni gaa mi, u Uwumbɔr tun ni na, ki kii man. Uwumbɔr aatuln le na.”

<sup>30</sup> Le bi baa u, “Aa ga tun lijnjiir aatuln bayaar, aan ti kan ki pak saah len pu na? Aa ga tun bayaar?”

<sup>31</sup> Tiyaaatiib nan ji tijikaar ti bi yin ti ke mana na,

nteersakpiin ni; ni ηmee Uwumbər Aagbaη ni ke, ‘U tii bi tijikaar ti nyan ni paacham na ke bi ji.’ ”†

<sup>32</sup> Le Yesu bui bi, “M tuk nimi mbaməɲ la, naa ye Moses le nan tii bi tijikaar ti nyan ni paacham na. Nte Uwumbər le tii nimi tijikaar baməɲn ti nyan ni paacham na. <sup>33</sup> Tijikaar ti Uwumbər tii nimi na le ye tijikaar ti nyan ni paacham ki tii dulnyaa ni aanib liməfal li kaa kpa ndoon na.”

<sup>34</sup> Le bi bui u, “Tidindaan, li tii timi tijikaar ngbaan n-yoonn məmək.”

<sup>35</sup> Le u bui bi, “Min le ye liməfal aajikaar. Unii umək dan m chee na kan, nkon aan ki chuu u. Unii umək gaa mi ki kii na, nnyunyuu aan ki chuu u.

<sup>36</sup> M nan tuk nimi ke ni kan mi, ki mu aa gaa mi ki kii. <sup>37</sup> Binib bimək Uwumbər di bi tii mi na, bi ga dan m chee. Unii umək dan m chee na, maan yii u, m ga gaa u. <sup>38</sup> M nyan ni paacham ke m nan ηa Uwumbər u tun ni mi na aageehn la. Maa dan m nan ηa mbaa aageehn. <sup>39</sup> Uwumbər aah tii mi binib bimək na, u ban ke m taa cha bi ponn ni ubaa wəη. U ban ke m fikr bi məmək nkun ni, kookoo aataadaal. Waageehn le na. <sup>40</sup> U ban ke unii umək bee ke m ye Ujapəɲn, ki gaa mi ki kii na, u li kpa liməfal li kaa kpa ndoon na. Le m ga fikr u nkun ni, kookoo aataadaal. Nte Uwumbər aageehn le na.”

<sup>41</sup> Le Juu yaab ηul u pu, ke ba ηa u bui ke u ye tijikaar ti nyan ni paacham na. <sup>42</sup> Le bi baa təb ke, “Uja wee aa ye Josef aajapəɲn Yesu uu? Ti nyi ute ni una. Ba ηa u len ke u nyan ni paacham?”

<sup>43</sup> Le Yesu bui bi, “Ni taa ηulni təb chee man. <sup>44</sup> Unii ubaa aan ηmaa dan m chee see Nte

† **6:31** : Lik Nnyam 16.4, 15; Ilahn 78.24.

Uwumbər u tun ni mi na daa foor ni u m chee. Unii umək dan m chee na le m ga fikr u nkun ni, kookoo aataadaal. <sup>45</sup> Uwumbər aabənabtiib nan ηmee ke Uwumbər ga mək bi məmək waasan.† Unii umək ηun Nte Uwumbər aah len pu na, ki bae waakaal na, u ga dan m chee. <sup>46</sup> Ubaa aa kee kan Nte Uwumbər. Min u nyan ni u chee na baanja le kan u. <sup>47</sup> M tuk nimi mbamən la, unii umək gaa mi ki kii na kpa liməfal li kaa kpa ndoon na. <sup>48</sup> Min le ye liməfal aajikaar. <sup>49</sup> Niyaaajatiib bi nan jin mana ngbaan nteersakpiin ni na, bi kpo a. <sup>50</sup> Unii umək ji tijikaar ti nyan ni paacham na aan kpo. <sup>51</sup> Min le ye tijikaar ti nyan ni paacham ki tii binib liməfal na. Unii yaa ji tijikaar ngbaan kan, u ga li bi n-yoonn mu kaa kpa ndoon na. Tijikaar ti m ga tii u na, tima le ye maawon. M ga di maawon tii dulnyaa ni aanib, aan bi kan liməfal.”

<sup>52</sup> Waah len kina na, le Juu yaab kpak təb kinikpapak, “Uja ngbaan ga ηa kinye ki tii timi waawon, aan ti ji?”

<sup>53</sup> Le u bui bi, “M tuk nimi mbamən la, ni yaa kaa ji min Unibən Aabo aawon, kaa nyu maasin kan, naa kpa liməfal li kaa kpa ndoon na. <sup>54</sup> Unii umək ji maawon ki nyu maasin na, u kpa liməfal li kaa kpa ndoon na, le m ga nan fikr u nkun ni, kookoo aataadaal. <sup>55</sup> Maawon ye tijikaar bamənn la. Maasin ye tiwanyukaan bamənn la. <sup>56</sup> Unii umək ji maawon ki nyu maasin na, u bi m ni, le m mu bi u ni. <sup>57</sup> Nte Uwumbər u ye liməfal daan ki tun ni mi na, u pu le m kpa liməfal. Unii umək ji mi na, m pu le u mu ga li kpa liməfal. <sup>58</sup> Timina le ye

---

† **6:45** : Lik Aisaya 54.13.

tijikaar ti nyan ni paacham na. Unii umək ji ti na ga li bi, ki nan saa n-yoonn mu kaa kpa ndoon na. Tijikaar timina aa bi ke tijikaar ti niyaajatiib nan jin ti na; tijikaar ngbaan aa nan tii bi liməfal li kaa kpa ndoon na.”

<sup>59</sup> Yesu nan bi mmeen aadiik ni, Kapenaum aatinj ni, le ki len kina.

*Liməfal li kaa kpa ndoon na aabər*

<sup>60</sup> Binib bi dii u na aah ɲun kina na, le bi ponn ni pam bui ke, “Ti ye tibər ti pəə na la. Ubaa aa ɲmaa pel ti.”

<sup>61</sup> Le u bee usui ni ke bi ɲulni tibər ngbaan pu, le ki baa bi, “Timina le kiir nimi maasan ni ii? <sup>62</sup> Ni yaa ti kan min Unibən Aabo gir buen paacham maah nan bi nin chee na kan, ni ga len kinye?”

<sup>63</sup> Uwumbər Aafuur Nyaan le tii binib liməfal. Tiwon aa kpa tinyoor tibaa. Tibər ti m len ni chee na le tii nimi Nfuur Nyaan ni liməfal. <sup>64</sup> Ni ponn ni bibaa mu aa gaa mi ki kii.” Yesu aah nan piin waatuln buyoonn na, u nan nyi binib bi kaa gaa u ki kii na, ki nyi udaan u ga nan di u kooh waadim pu na. <sup>65</sup> Le u ki bui bi, “Nima le cha m tuk nimi ke ubaa aa ɲmaa dan m chee, see Nte Uwumbər cha u dan.”

<sup>66</sup> Nee aapuwəb le binib bi dii u na ponn ni pam gir puwəb kaa ki dii u. <sup>67</sup> Le u baa waadidiliib kipiik ni bilee na, “Ni mu ga buen cha mi ii?”

<sup>68</sup> Le Simonn Piita bui u, “Ndindaan, ti ga buen ɲma chee? Sin le kpa liməfal li kaa kpa ndoon na aaliin. <sup>69</sup> Ti pak saah len pu na, ki bee ke aa ye Uwumbər Aanii u ye Chain na la.”



<sup>70</sup> Le u bui bi, “M nyan nimi binib kipiik ni bilee, le ni ponn ni ubaa ye kinimbəŋ aanii.” <sup>71</sup> U len Judas u ye Simonn Iskariot aajapəəŋ na aabər la; uma Judas mu nan ye waadidiliib kipiik ni bilee na ponn ni ubaa, u ga nan di Yesu kooh waadim pu na.

## 7

### *Yesu ni unaatiib aah len təb chee tibər pu na*

<sup>1</sup> Nee aapuwəb le Yesu bə dii Galilee aatingbaan ni. Waa gee u bə dii Judea aatingbaan ni; ba pu? Juu yaab bi bi nima na ban ke bi ku u la. <sup>2</sup> Ni nan gur siib, Juu yaab ji njim mu bi yin mu ke Tikakar Aajim na.\* <sup>3</sup> Le unaatiib bui u, “Siir do, ki li cha Judea aatiŋ ni, aan binib bi dii si na mu ti kan saah tun lijnjiir aatun pu na. <sup>4</sup> Unii u ban u li kpa liyimbil na, waan bər waah tun pu na. Aa yaa tun lijnjiir aatun kan, cha binib məmək kan saah tun pu na.” <sup>5</sup> Unaatiib mu aa nan gaa u ki kii.

<sup>6</sup> Le u bui bi, “Maayoonn aa kee fuu. Nimi aayoonn bi n-yoonn məmək la. <sup>7</sup> Dulnyaa aanib aa ŋmaa li nan nimi. Bi nan mi la; ba pu? m tuk bi ke baatuln aa ŋan. <sup>8</sup> Ni li cha ti ji njim ngbaan. Maan kee buen; maayoonn aa kee fuu.” <sup>9</sup> U nan len bi chee kina, ki gaar Galilee aatiŋ ni.

### *Yesu aah jin njim ngbaan pu na*

<sup>10</sup> Unaatiib aah buen bi ti ji njim ngbaan na, le u mu paan. Waa dii nsan binib aanimbil ni, ubaa aa nyi ubər. <sup>11</sup> Le Juu yaab aaninkpiib ban u binib bi ji njim na ponn ni, ki baa ke u bi la.

\* **7:2** : Lik Liifai Yaab 23.34; Ikaal 16.13.

<sup>12</sup> Le kinipaak na looni len waabər təb chee. Bibaa len ke u ye unibamənn la. Biken len ke waa ye, u nmanni binib la. <sup>13</sup> Ubaa mu aa len waabər lipaal; bi san Juu yaab aaninkpiib ijawaan la.

<sup>14</sup> Njim ngbaan aakpaakool aakaasisik ni le Yesu koo Uwumbər Aadichal ni, le ki tuk binib Uwumbər aabər. <sup>15</sup> Le ni gar Juu yaab aaninkpiib, ke uja ngbaan aa bae mbaem; u nja kinye ki nyi kigban?

<sup>16</sup> Le u bui bi, “Maah mək binib na, naa ye min mbaa aaməkm, ni ye Uwumbər u tun ni mi na aaməkm la. <sup>17</sup> Unii ubaa yaa ban ke u nja Uwumbər aageehn kan, u ga bee ke maah mək binib pu na, ni ye Uwumbər aaməkm la, naa ye min mbaa aaməkm. <sup>18</sup> Unii u len ubaa pu na, u ban ke binib nyuŋ u la. Unii u ban ke binib nyuŋ unii u tun ni u na, uma le ye mbaməndaan, kaa nmanni binib. <sup>19</sup> Moses nan tii nimi nkaal. Ni ponn ni ubaa aa dii nkaal ngbaan. Ba nja ni ban ni ku mi?”

<sup>20</sup> Le kinipaak ngbaan bui u, “Aa kpa kinimbəŋ la. Nma ban u ku si?”

<sup>21</sup> Le u bui bi, “Maah tun lijnjiir aatuln libaa likpaakool daal na, le ni gar ni məmək. <sup>22</sup> Moses nan tii nimi nkaal ke ni li geei nchakpan. Tə, naa ye Moses le puen tii nimi nkaal ngbaan, niyaajatiib le nan puen tii nimi. Likpaakool daal, ubo u njeer ni gii uchakpaln na kan, ni geei la. <sup>23</sup> Ni geei ubo aachakpaln likpaakool daal ke ni taa bii Moses aakaal. Le maah cha ubun aawon məmək pəək likpaakool daal na, ni gee lijuul m pu uu? <sup>24</sup> Ni taa bii unii, kaa nyi tibər ti bi usui ni na. Puen bee tiwan ni bi usui ni na, aan ki nin len waabər mbaməm.”

*Baah len Yesu aabər tǝb chee pu na*

<sup>25</sup> Yesu aah len kina na, le Jerusalem yaab bibaa baa ke, “Uja wee le bi ban bi ku u na aa? <sup>26</sup> Lik waah len binib aanimbil ni pu na, le ubaa aa len tibaa. Ni ye ke timi aaninkpiib sil nyi ke u ye Kristo u ga gaa timi lii na aa? <sup>27</sup> Kristo na yaa fuu ni kan, ubaa aan bee waah nyan nin chee na. Uja wee ma kan, ti mǝmǝk nyi waah nyan nin chee na.”

<sup>28</sup> Yesu nan bi Uwumbər Aadichal ni, ki bi tuk binib waaliin, le ki len mpǝn pu, “Ni sil nyi mi ii? Ni nyi maah nyan nin chee na aa? Maa dan mbaa pu. U tun ni mi na ye mbamǝndaan la. Le naa nyi u. <sup>29</sup> Min le nyi u; uma le tun ni mi. M nyan ni u chee la.”

<sup>30</sup> Waah len kina na, le bi ban bi chuu u. Ubaa mu aa ŋa u nibaa; ba pu? waayoonn aa nan kee fuu. <sup>31</sup> Kinipaak ngbaan ponn ni binib pam le gaa u ki kii, le ki bui ke, “Kristo yaa fuu ni kan, waan tun lijnjiir aatun ki jer uja ngbaan aah tun pu na.”

*Baah ban ke bi chuu Yesu pu na*

<sup>32</sup> Farisii yaab nan ŋun kinipaak ngbaan looni len Yesu aabər kina. Le bi ni Uwumbər aato-toorninkpiib tun baatutum ke bi ti chuu ni u. <sup>33</sup> U nan bui kinipaak ngbaan, “M ga li bi ni chee ni yunn siib, le ki nin gir buen u tun ni mi na chee. <sup>34</sup> Ni ga nan ban mi, kaan kan mi. Maah ga ti li bi nin chee na, naan ŋmaa buen nima chee.”

<sup>35</sup> Juu yaab nan baa tǝb ke, “Uja ngbaan ga buen la chee, aan taan kan u? U ga buen Juu yaab aah yaa nin chee Griik yaab aatingbaan ni na, ki ti tuk Griik yaab Uwumbər aabər aa? <sup>36</sup> U len ke ti ga ban u, kaan kan u, kaan ŋmaa buen waah ga li bi nin chee na. Waah len pu na aatataa ye kinye?”

### *Limɔfal aanyun aabɔr*

<sup>37</sup> Bundaln njim ga doo na, liyaadaal le nan ye njim sakkem. Liyaadaal ngbaan le Yesu sil ki len mpɔɔn pu, “Nnyunyuu yaa chuu u na kan, udaan dan m chee ki nan nyu. <sup>38</sup> Uwumbɔr Aagban len ke, ‘Unii umɔk gaa mi ki kii na, limɔfal aanyun ga puu nyan ni usui ni.’ ” <sup>39</sup> Waah len pu na aatataa le ye ke binib bi gaa u ki kii na, bi ga gaa Uwumbɔr Aafuur Nyaan. N-yoonn ngbaan Uwumbɔr aa nan kee tii binib Waafuur Nyaan; ba pu? waa nan kee yoor Yesu paacham.

### *Kinipaak ngbaan aah len Yesu aabɔr tɔb chee pu na*

<sup>40</sup> Kinipaak ngbaan aah nɔn Yesu aah len pu na, le bibaa bui ke, “Uja ngbaan sil ye Uwumbɔr Aabɔnabr na la.”

<sup>41</sup> Bibaa mu bui ke u ye Kristo u ga gaa binib lii na la.

Biken mu bui ke, “Waa ye, ke Kristo aan nyan ni Galilee aatin ni. <sup>42</sup> Uwumbɔr Aagban len ke u ga li ye tiyaaja David aayaabil, ki ga nyan ni Betlehem aatin ni, kitiŋ ki ye David do na.” <sup>43</sup> Kinipaak ngbaan mɔk aamɔi nan bi ibaabaa la le Yesu aabɔr pu. <sup>44</sup> Bibaa mu nan ban bi chuu u mpɔɔn. Ubaa mu aa nɔa u nibaa.

### *Juu yaab aaninkpiib aah kaa gaa Yesu ki kii pu na*

<sup>45</sup> Uwumbɔr aatotoorninkpiib ni Farisii yaab aah tun bitutum ke bi ti chuu ni Yesu na, le bitutum ngbaan gir ni bi chee. Le bi baa bi, “Ba nɔa naa chuu ni u?”

<sup>46</sup> Le bi bui bi, “Unii ubaa aa kee len ke waah len pu na.”

<sup>47</sup> Le Farisii yaab na baa bi, “U ηmann ni mu la aa? <sup>48</sup> Timi Farisii yaab ni nimi aaninkpiib ponn ni ubaa gaa u ki kii ii? <sup>49</sup> Kinipaak bi kaa nyi Uwumbər aakaal na ma kan, tibəbir bi bi pu la.”

<sup>50</sup> Nikodemus u nan buen Yesu chee kinyeek na, u mu nan ye Farisii yaab ponn ni ubaa, le ki baa bi, <sup>51</sup> “Timi aakaal aah dii pu na, ti ga ηmaa bii unii kaa puen jin u tibər ki bee waah tun pu na aa?”

<sup>52</sup> Le Farisii yaab na baa u, “Aa mu nyan ni Galilee aatiŋ ni la aa? Aa yaa karn Uwumbər Aagbaŋ ni kan, aa ga bee ke Uwumbər aabənbr ubaa aa nyan ni nima.”

[ <sup>53</sup> Le bi məmək kun.

## 8

### *Upii u ηa kidagook na*

<sup>1</sup> Yesu nan buen lijool libaa paab, bi yin li ke Olif aasui aajool. <sup>2</sup> Le ki woln kitaak kichakpinaanyeek ni, le u gir buen Uwumbər Aadichal ni. Le kinipaak kuun u chee, le u kal ki tuk bi Uwumbər aabər. <sup>3</sup> Le Uwumbər aakaal aaməmək ni Farisii yaab joo ni upii u bi pii u, u bi ηani kidagook na, le ki di u siin kinipaak ngbaan aanimbiin ni, <sup>4</sup> ki bui Yesu, “Uməmək, upii wee bi ηani kidagook, le bi pii u. <sup>5</sup> Moses aakaal len ke unii yaa ηa kina kan, bi yur u ηitakpal ki ku u, tə, aa len waabər kinye?” <sup>6</sup> Baah baa Yesu kina na, bi nan bi təŋni u ke bi kan waataani aan ki galn u. Le u boon ki joo uŋanbil ηmee kitin.

<sup>7</sup> Bi nan beenin baa u, le u yaar ki bui bi, “Ni ponn ni u kaa kpa taani na kan, u puen mee upii wee litakpal,” <sup>8</sup> ki ki boon ki joo uŋanbil ki ηmee

kitiŋ. <sup>9</sup> Baah ŋun u len kina na, le bi məmək bolni ubaabaa; [ba pu? baalandak galn bi]. U ye uninkpel na puen boln siir, le bi məmək bolni ubaabaa, ki ti cha upii ngbaan si Yesu aanimbiin ni. <sup>10</sup> Le Yesu yaar ki baa u, “Upii, bi bi la chee? Ubaa aa galn si ii?”

<sup>11</sup> Le u bui u, “Ndindaan, ubaa aa galn mi.”

Le Yesu bui u, “M mu aan galn si. Li cha, ki taa ki tun titunwanbir.”]

*Yesu le ye dulnyaa ni aawiihn*

<sup>12</sup> Yesu nan ki len kinipaak ngbaan chee ki bui bi, “Min le ye dulnyaa ni aawiihn ki wolni binib aanimbil. Unii umək dii mi na aan li bi mbəmbəən ni. U ga li kpa liməfal, ki ga li bi nwiihn ni.”

<sup>13</sup> Waah len kina na, le Farisii yaab bui u, “Aa ji seeraa ki tii aabaa la. Saaseeraa aa ye mbamən.”

<sup>14</sup> Le u bui bi, “M yaa ji seeraa ki tii mbaa kan, maaseeraa ye mbamən; ba pu? m nyi maah nyan ni nin chee na, ki nyi maah cha nin chee na mu. Nimi le aa nyi maah nyan ni nin chee na, kaa nyi maah cha nin chee na mu. <sup>15</sup> Ni len maabər binibəm aah len tibər pu na la. Maa len unii ubaa aabər. <sup>16</sup> M yaa len binib aabər kan, m len mbamən la; ba pu? naa ye min baanja le len baabər, m ni Uwumbər u tun ni mi na le len. <sup>17</sup> Nimi aakaal ponn ni, ni ŋmee ke binib bilee yaa ji seeraa ki len tibəbaan kan, baaseeraa ye mbamən la. <sup>18</sup> M ji seeraa ki tii mbaa la. Nte u tun ni mi na mu ji seeraa ki tii mi.”

<sup>19</sup> Le bi baa u, “Aate bi la?”

Le u bui bi, “Naa nyi mi, kaa nyi Nte mu. Ni yaa ba nyi mi kan, ni ba ga li nyi Nte mu.”

<sup>20</sup> Waah len kina na, u nan bi Uwumbər Aadichal ni, baah tii Uwumbər ηimombil nin chee na. Le ubaa aa chuu u; ba pu? waayoonn aa kee fuu.

*Yesu aah sur Juu yaab pu na*

<sup>21</sup> Le u ki tuk bi, “M ga buen nibaa chee. Ni ga ban mi, kaan kan mi, ki ga nan kpo; le Uwumbər aan di cha pinn nimi. Maah cha nin chee na, naan ηmaa buen nima chee.”

<sup>22</sup> Le Juu yaab baa tɔb, “U ga ku ubaa la aa? U len ke waah cha nin chee na, taan ηmaa buen nima chee.”

<sup>23</sup> Le u bui bi, “Ni nyan ni taab, le m ma nyan ni paacham. Ni ye kitiη pu yaab la. Maa ye kitiη pu yoo. <sup>24</sup> Nima le cha m tuk nimi ke ni ga kpo, le Uwumbər aan di cha pinn nimi; ba pu? ni yaa kaa gaa mi ki kii ke m ye maah tuk nimi pu na kan, ni ga kpo, le Uwumbər aan di cha pinn nimi.”

<sup>25</sup> Le bi baa u, “Aa ye ηma?”

Le u bui bi, “Maah tuk nimi n-yoonn mɔmɔk pu na, m ye kina la. <sup>26</sup> M ga ηmaa len tibər sakpenn ti ga bii nimi na. U tun ni mi na ye ubamɔndaan la. Le m ηun waah len pu na, ki tuk dulnyaa ni aanib.”

<sup>27</sup> Yesu aah len kina na, baa bee ke u len Ute Uwumbər aabər la. <sup>28</sup> Nima pu le u bui bi, “Ni yaa nan yoor min Unibɔn Aabo kitiη paacham kan, ni ga bee ke m ye maah ye u na. Ni ga bee ke maa tun nibaa mbaa pu. M len Nte Uwumbər aah tuk mi pu na la. <sup>29</sup> U tun ni mi na bi m chee la. Waa cha m bi mbaa; ba pu? n-yoonn mɔmɔk m tun lituln li piir usui na la.”

<sup>30</sup> Yesu aah len kina na, le binib pam gaa u ki kii.

*Titunwanbir aah chuu binib tinaagbiir pu na*

<sup>31</sup> Le u tuk Juu yaab bi gaa u ki kii na, “Ni yaa beenin joo maamɔbon kan, ni sil ye maadidiliib la.

<sup>32</sup> Le ni ga li beer tibɔbamɔnn. Tibɔbamɔnn tee le ga nya nimi tinaagbiir ni.”

<sup>33</sup> Le bi bui u, “Ti ye Abraham aayaabitiib la. Ubaa aa kee chuu timi tinaagbiir. Ba ɲa aa bui ke ti ga nya tinaagbiir ni?”

<sup>34</sup> Le u bui bi, “M tuk nimi mbamɔn la, unii umɔk tun titunwanbir na kan, u ye titunwanbir aanaagbiija la. <sup>35</sup> Unaagbiija aan li bi udindaan do n-yoonn mɔmɔk. Udindaan aajapɔɔn ma ga li bi n-yoonn mɔmɔk. <sup>36</sup> Nima pu na, min Uwumbɔr Aajapɔɔn yaa nyan nimi tinaagbiir ni kan, ni ga sil nya tinaagbiir ni. <sup>37</sup> M nyi ke ni ye Abraham aayaabitiib, le ki tee ban ni ku mi. Ni yii maaliin la. Nima le cha ni ban ni ku mi. <sup>38</sup> M tuk nimi maah kan Nte Uwumbɔr chee pu na la. Ni mu ɲani naah ɲun nite chee pu na la.”

<sup>39</sup> Le bi bui u, “Tite le ye Abraham.”

Le u bui bi, “Ni yaa ba ye Abraham aabibamɔm kan, ni ba ga tun waah nan tun pu na. <sup>40</sup> M ɲun tibɔbamɔnn Uwumbɔr chee, le ki tuk nimi. Le ni ban ni ku mi. Abraham aa nan ɲani kina. <sup>41</sup> Ni ɲani ke nite aah ɲani pu na la.”

Le bi bui u, “Taa ye mbɔnbim. Tite ye ubaa la. Uma le ye Uwumbɔr.”

<sup>42</sup> Le u bui bi, “Nite yaa ba sil ye Uwumbɔr kan, ni ba ga li gee mi; ba pu? m nyan ni u chee le ki dan do. Maa dan mbaa pu. Uma le tun ni mi.

<sup>43</sup> Ba ɲa naa bee maah len pu na aatataa? Ni ye ke naa gee ke ni ɲun maaliin la. <sup>44</sup> Kinimbɔɲ aabim le ye nimi, kima le ye nite. Le ni ban ni li ɲani kaah



gee pu na. Dulnyaa aah nan piin buyoonn ki nan saa dandana na, ki ye unukur la. Kaa len ibamən. Mbamən aa bi ki ni. Ki yaa len inyamən kan, ki len tibər ti bi ki ni na la. Ki ye unyaməndaan la. Kima le naan inyamən. <sup>45</sup> M ma len ibamən la. Nima le cha naa pak maaliin. <sup>46</sup> Ni ponn ni, ηma ga ηmaa mək maatunwanbir? M len ibamən la. Ba ηa naa pak maah len pu na? <sup>47</sup> Unii umək ye Uwumbər yoo na kan, uma le ηun waaliin. Nimi le aa ηun waaliin. Ba pu? Naa ye waanib. Nima le cha naa ηun waaliin.”

*Unii umək kii Yesu aabər na aan kpo*

<sup>48</sup> Le bi bui u, “Taah len ke aa ye Samaria aatin aanii ki kpa kinimbəη na, ti len mbamən la.”

<sup>49</sup> Le u bui bi, “Maa kpa kinimbəη. M nyuη Nte Uwumbər la. Le ni sii mi. <sup>50</sup> Min le aa nyuηni mbaa; Uwumbər le nyuηni mi. Uma le ga ji binib tibər. <sup>51</sup> M tuk nimi mbamən la, unii yaa joo maaliin kan, waan kpo.”

<sup>52</sup> Le bi bui u, “Dandana wee ti bee ke aa kpa kinimbəη la. Tiyaaja Abraham nan kpo. Uwumbər aabənabtiib mu nan kpo, le aa len ke unii yaa joo saaliin kan, waan kpo. <sup>53</sup> Aa jer tiyaaja Abraham la aa? U nan kpo. Uwumbər aabənabtiib mu nan kpo. Aa len ke aa ye ηma?”

<sup>54</sup> Le u bui bi, “M yaa nyuηni mbaa kan, ni ye fam la; Nte le nyuηni mi. Uma le ni len ke u ye nimi Aawumbər. <sup>55</sup> Le naa nyi u. Min le nyi u. M yaa len ke maa nyi u kan, m ga li ye unyaməndaan la, ke naah ye binyaməndam pu na. M sil nyi u, ki joo waaliin. <sup>56</sup> Niyaaaja Abraham nan mənəni; ba pu? u

ga nan kan buyoonn m ga dan na. Waah sil kan n-yoonn mue na, nima le u nan kpa mpopiin.”

<sup>57</sup> Le bi baa u, “Saa ye ŋibin piinjmu aanii, ki bui ke aa nyi Abraham aa?”

<sup>58</sup> Le u bui bi, “M tuk nimi mbamɔn la, baah kaa nan kee ma Abraham buyoonn na, m nan bi.”

<sup>59</sup> Le bi yoor ŋitakpal bi ti mae u. Le u miln ki nyan Uwumbɔr Aadichal ni.

## 9

### *Yesu aah likr ujoon aanibil pu na*

<sup>1</sup> Waah chuun cha na, le u kan ujoon ubaa. Baah ma u na, u nan ye ujoon la. <sup>2</sup> Le Yesu aadidiliib baa u, “Umɔmɔkr, uja ngbaan le tun titunwanbir, aan ute ni una le tun, aan bi ma u ujoon.”

<sup>3</sup> Le Yesu bui bi, “Naa ye uja ngbaan aatunwanbir pu, ki mu aa ye ute, bee una aatunwanbir pu. U ye ujoon aan binib kan Uwumbɔr aah ga tun lijnjiir aatuln pu ki tii u na. <sup>4</sup> Ni ŋan ke ti tun Uwumbɔr u tun ni mi na aatuln nwiihn aah laa bi pu na; mbɔmbɔɔn choo, le ubaa aan ki ŋmaa tun. <sup>5</sup> Maah laa bi dulnyaa ni na, m ye dulnyaa ni aawiihn ki wolni binib aanibil la.”

<sup>6</sup> Waah len kina ki ti doo na, le u tii timɔɔtan lii kitiŋ, ki di uŋaal lee, le ni ŋa titan, le ki di pɔl ujoon ngbaan aanibil, <sup>7</sup> ki bui u, “Li cha ki ti finn aanibil nnyunbun mu bi yin mu ke Siloam na ni.” Siloam aatataa le ye ke “Bi tun u.” Le ujoon ngbaan buen ti finn unibil, le unibil likr, le u gir ni.

<sup>8</sup> Le udoyaab, ni binib bi nyi ke u ye uwanmeer na baa tɔb, “Naa ye uja wee le nan ka ki mee na aa?”

<sup>9</sup> Bibaa bui ke u ye. Biken mu bui ke bi naahn la, waa ye.

Le uma ubaa bui ke u ye.

<sup>10</sup> Le bi baa u, “Aa ŋa kinye aan ki likr?”

<sup>11</sup> Le u bui bi, “Uja u bi yin u ke Yesu na, uma le nan di titan pəl nnimbil, le ki bui mi ke m li cha Siloam aanyunbun ni ki ti finn nnimbil. Le m buen ti finn, le nnimbil likr.”

<sup>12</sup> Le bi baa u, “U bi la chee?”

Le u bui bi, “Maa nyi.”

*Farisii yaab baa u waah ŋa pu aan ki likr na*

<sup>13</sup> Le bi di u buen Farisii yaab chee. <sup>14</sup> Bundaln Yesu ŋa titan ki likr unimbil na nan ye Juu yaab aakpaakool daal la. <sup>15</sup> Le Farisii yaab baa uja u nan ye ujoon na, “Aa ŋa kinye aan ki ti likr?” Le u bui bi, “U di titan le pəl nnimbil, le m finn, le nnimbil likr.”

<sup>16</sup> Le Farisii yaab bibaa bui ke, “Uja ngbaan aa joo likpaakool daal aakaal, nima le mək ke waa nyan ni Uwumbər chee.”

Le biken mu bui ke, “Unii yaa ye utunwanbir-daan kan, u ga ŋa kinye ki tun lijnjiir aatuln ke waah tun pu na?” Le bi məmək aaməi nan bi ibaabaa.

<sup>17</sup> Le bi ki baa uja u nan ye ujoon na, “Waah likr aanimbil na, aa len waabər kinye?”

Le u bui bi, “U ye Uwumbər aabənabr la.”

<sup>18</sup> Le baa pak ke u nan ye ujoon le ki likr. Le bi yin ni ute ni una, <sup>19</sup> ki nan baa bi, “Nijapəon le na aa? Naah ma u na, u ye ujoon la aa? tɔ, u ŋa kinye ki likr dandana wee?”

<sup>20</sup> Le ute ni una bui bi, “Ti nyi ke tijapəon ye. Taah nan ma u na, u ye ujoon la. <sup>21</sup> Ti mu aa nyi

waah ŋa pu ki likr dandana wee na, ki mu aa nyi udaan u likr unimbil na. U mu aa ki ye ubo. Baa u man. U ga tuk nimi waabɔr.” <sup>22</sup> Budabu cha bi len kina na le ye ke bi san Juu yaab aaninkpiib ijawaan; ba pu? Juu yaab aaninkpiib nan puun len ke unii yaa bui ke Yesu le ye Kristo u ga gaa binib lii na kan, bi ga nyan udaan mmeen aadiik ni. <sup>23</sup> Nima le ute ni una bui ke, “Waa ki ye ubo. Baa u man.”

<sup>24</sup> Le Farisii yaab ki yin uja u nan ye ujoon na, le ki nan bui u, “Nyun Uwumbɔr. Ti nyi ke uja ngbaan le ye titunwanbirdaan.”

<sup>25</sup> Le u bui bi, “Maan ŋmaa bee ke u ye titunwanbirdaan, bee waa ye. Maah nyi ni na le ye ke m nan ye ujoon la. Dandana wee nnimbil likr a.”

<sup>26</sup> Le bi baa u, “U ŋa kinye aan ki likr aanimbil?”

<sup>27</sup> Le u bui bi, “Dandana wee le m tuk nimi. Le naa gee ke ni ŋun. Ba pu ni ban ke m ki gir tuk nimi? Ni mu ban ke ni ŋa waadidiliib la aa?”

<sup>28</sup> Waah len kina na, le bi sii u, ki bui u, “Aa ye waadidiir la. Tima kan, ti ye Moses aadidiliib la. <sup>29</sup> Ti nyi ke Uwumbɔr nan len Moses chee tibɔr. Uja ngbaan ma kan, taa nyi waah nyan nin chee na.”

<sup>30</sup> Le u bui bi, “U likr nnimbil la. Le naa nyi waah nyan nin chee na. Ni gar mi pam. <sup>31</sup> Ti nyi ke Uwumbɔr aan ŋun titunwanbirdam aameen. Unii yaa dii Uwumbɔr ki ŋa Uwumbɔr aageehn kan, uma le Uwumbɔr ga ŋun waameen. <sup>32</sup> Dulnyaa aah piin ki nan saa din na, baa kee ŋun ke unii likr unii u bi ma u ijoon ni na aanimbil. <sup>33</sup> Uja ngbaan yaa kaa nyan ni Uwumbɔr chee kan, waa ba ga ŋmaa ŋa nibaa.”

<sup>34</sup> Le bi bui u, “Bi ma si aa ye titunwanbirdaan la. Aa ye ηma ki mək timi?” le ki jenn nyan u mmeen aadiik ni.

*Yesu aah wolni binib aanimbil pu na*

<sup>35</sup> Yesu nan ηun ke bi nyan u. Le u ti kan u, le ki baa u, “Aa gaa Uwumbər Aajapəən ki kii ii?”

<sup>36</sup> Le u baa u, “Ndindaan, ηma ye Uwumbər Aajapəən? Tuk mi aan m gaa u ki kii.”

<sup>37</sup> Le Yesu bui u, “Aa waa u. Uma le len aa chee tibər na.”

<sup>38</sup> Le u bui u, “Ndindaan, m gaa si ki kii,” le ki gbaan unimbiin ni, ki pak u.

<sup>39</sup> Le Yesu bui ke, “M dan dulnyaa wee ni, m nan ji binib tibər, ki woln binib bi aanimbil aa woln na aanimbil, ki jəb binib bi aanimbil woln na aanimbil.”

<sup>40</sup> Le Farisii yaab bi bi u chee na ηun waah len pu na, le ki baa u, “Ti mu aanimbil aa woln aa?”

<sup>41</sup> Le u bui bi, “Ninimbil yaa kaa ba woln kan, naa ba ga li kpa ngalm. Le ni len ke ninimbil woln, nima pu le ni kpa ngalm.”

## 10

*Ipiih aabəkpun aayatanəkl*

<sup>1</sup> “M tuk nimi mbamən la, unii u loon ki koo ipiih aabəkpun ni, kaa dii mbisaməb na, u ye unaayuk la, ki ga peel ipiih mpəən. <sup>2</sup> Unii u dii mbisaməb koo ni na, uma le ye upihdaan. <sup>3</sup> Unii u kii mbisaməb na ga piir tii u. Le ipiih ηun waaneel. U yin uma ubaa aapiih aayimbil, le i nyan ni. <sup>4</sup> U yaa nyan waapiih məmək kan, le u loln nsan, le i paa u

pu; ba pu? i nyi waaneel. <sup>5</sup> Yaan dii uniyayan. I ga san u chee; ba pu? yaa nyi waaneel.”

<sup>6</sup> Yesu ŋak bi liyataŋakl ngbaan, le baa bee laatataa.

*Yesu aah ye upihdaanyaana pu na*

<sup>7</sup> Baah kaa bee liyataŋakl ngbaan aatataa na, le u ki bui bi, “M tuk nimi mbamɔn la, min le ye ipiih aabɔkpuŋ aabisamɔb. <sup>8</sup> Binib bimɔk puen mi ki dan na, bi nan ye binaayukb la, ki nan ban bi peel ipiih mpɔɔn. Ipii h aa nan pel baaneel. <sup>9</sup> Min le ye Uwumbɔr aanaan ni aabisamɔb. Unii yaa dii mi ki koo ni kan, u ga ŋmar, ki ga koo ki nya ki gir koo, ki ga kan timosoon la.\* <sup>10</sup> Unaayuk yaa dan kan, u ban ke u su ipiih, ki ku i, ki bii i la. M dan m nan tii binib limɔfal li kaa kpa ndoon na la.

<sup>11</sup> “Min le ye upihdaanyaana na. Upihdaanyaana ga ŋmaa kpo waapiih pu. <sup>12</sup> Unii u kpa ipiih ŋimombil pu, kaa ye upihdaan na, u yaa kan lisapol choo kan, u ga san cha i. Lisapol ga chur i, ki cha i yaa. <sup>13</sup> U kpa ipiih ŋimombil pu la. Utafal aa bi i ni. Nima le cha u san cha i. <sup>14</sup> Min le ye upihdaanyaana na, ki nyi maapiih. Le maapiih mu nyi mi, <sup>15</sup> ke Nte Uwumbɔr aah nyi mi pu na, kina le m mu nyi u. Le m ga kpo maapiih pu; ba pu? m ye upihdaanyaana na la. <sup>16</sup> M kpa ipiih iken i kaa ye kibɔkpuŋ kee ponn ni aapiih na. M ga li joo ni i mu. Le i ga ŋun maaneel. I mɔmɔk ga ŋa ipihbaan la, ki ga li kpa upihdaan ubaa la.

<sup>17</sup> “M ga di maamɔfal bil maanib pu, ki ga fikr nkun ni. Nima le cha Nte Uwumbɔr gee mi.

---

\* **10:9** : Naatataa le ye ke binib bi dii Yesu na kan lifuur ni limɔfal aajikaar.

18 Ubaa aan nyan maamɔfal m chee. M ga di li bil maageehn pu la. M kpa mpɔɔn ke m di li bil, ki kpa mpɔɔn ke m ki yoor li. Nte Uwumbɔr le tuk mi ke m ɲa kina.”

19 Yesu aah len kina ki ti doo na, le Juu yaab aamɔi bi ibaabaa. 20 Bi ponn ni pam nan bui ke, “Tiyayaar le joo u. U waar la. Ba ɲa ni pel waah len pu na?”

21 Le biken mu len ke waah len pu na, naa ye unii u tiyayaar joo u na aaliin, ke unii u tiyayaar joo u na aan ɲmaa likr bijoom aanimbil.

### *Juu yaab aah yii Yesu pu na*

22 N-yoonn ngbaan le Juu yaab ji njim Jerusalem ponn ni, ki teer baah nan toor Uwumbɔr Aadichal buyoonn na. Ni nan ye kakab aayoonn la. 23 Le Yesu nan bi chuun Solomonn aakaakpaak ki bi Uwumbɔr Aadichal ni na ni. 24 Le Juu yaab kuun ki si gob u, le ki baa u, “Aa ga cha ti li joo beeni ni yunn aa? Aa yaa ye Kristo u ga gaa timi lii na kan, tuk timi mbamɔn.”

25 Le u bui bi, “M nan tuk nimi, le naa pak maah len pu na. M tun lituln Nte Uwumbɔr aayimbil pu. Lituln ngbaan le mɔk maah ye udaan u na. 26 Nimi, naa ye maanib. Nima le cha naa pak maah len pu na. 27 Maanib ɲun maaneel, le m nyi bi, le bi dii mi. 28 M tii maanib limɔfal li kaa kpa ndoon na. Baan kpo, ubaa mu aan ɲmaa nyan bi ɲɲaal ni. 29 Nte Uwumbɔr u di bi tii mi na aapɔɔn jer mpɔɔn mɔmɔk. Ubaa aan ɲmaa nyan bi uma Uwumbɔr aaɲaal ni. 30 M ni Nte Uwumbɔr ye unibaan la.”

31 Waah len kina na, le Juu yaab ki yoor ɲitakpal bi ti mae u. 32 Le u bui bi, “M tun litunyaan pam

Nte Uwumbər aapɔɔn pu ninimbil ni. Lilatuln pu ni ban ni mae mi ɲitakpal?”

<sup>33</sup> Le Juu yaab bui u, “Naa ye litunyaan pu le cha ti ban ti mae si ɲitakpal. Aa sii Uwumbər la. Aa po ye unibɔn, le ki len ke aa ye Uwumbər la.”

<sup>34</sup> Le u bui bi, “Ni ɲmee nimi aakaal ponn ni ke Uwumbər len ke, ‘Ni ye maabim la.’ Ubaa aan ɲmaa ɲa Uwumbər aaliin yɔli. <sup>35</sup> Waah di waaliin ɲa binib bi aarɲaal ni na, u bui ke bi ye waabim. <sup>36</sup> M ma kan, Uwumbər nyan mi ki tun ni mi dulnyaa wee ni, le maah len ke m ye Ujapɔɔn na, ni bui ke m sii u uu? <sup>37</sup> M yaa kaa tun Nte Uwumbər aatuln kan, ni taa pak maah len pu na. <sup>38</sup> Ni yaa kaa pak maah len pu na kan, ni gaa mi ki kii Uwumbər aatuln li m tun na pu, aan ki bee mbamɔm ke Nte Uwumbər bi m ni, m mu bi u ni.”

<sup>39</sup> Waah len kina na, le bi ki ban bi chuu u mpɔɔn, le u miln bi chee.

<sup>40</sup> Le u ki puur Jɔɔdann aamɔɔdapuul, le ki ti fuu nin chee Jonn nan muin binib nnyun ni njan na, ki nan bi nima. <sup>41</sup> Le kinipaak dan u chee, ki nan bui ke, “Jonn aa nan tun lijnjiir aatuln; tɔ, u mu aah len uja wee aabər ti na mɔmɔk gbii.” <sup>42</sup> Le binib gaa u ki kii nima chee, ki wiir.

## 11

### *Lasarus aah nan kpo pu na*

<sup>1</sup> Tɔ, uja ubaa nan bi, le ki bun, bi nan yin u ke Lasarus. U ni uninkpatiib Mari ni Mata nan bi kitin kibaa ni, bi yin ki ke Betani. <sup>2</sup> Mari ngbaan le ye upii u nan di tulalee kpir Tidindaan aataa pu, ki di waayikpir per na. Uma le aaninja Lasarus nan



bun. <sup>3</sup> Waah bun na, le uninkpatiib tun unii u ti tuk Yesu, “Tidindaan, unii u aa gee u na bun.”

<sup>4</sup> Yesu aah nun kina na, le u bui ke, “Iween ngbaan aadoon aan li ye nkun. Yaadoon le ga cha binib nyun Uwumbor aan ki nyun min Ujapoon mu.”

<sup>5</sup> To, Yesu nan gee Mata, ni unaal, ni Lasarus. <sup>6</sup> Waah nun ke u bun na, le u gaar waah bi nin chee na iwiin ilee. <sup>7</sup> Iwiin ilee ngbaan aah jer na, le u bui waadidiliib, “Cha ti ki gir buen Judea aatin ni man.”

<sup>8</sup> Le waadidiliib baa u, “Umomokr, naa ye dandana le Juu yaab ban bi mae si nitakpal nima aa? Le aa ki ban aa gir buen nima aa?”

<sup>9</sup> Le u baa bi, “Nwiin mubaa aa ye tikur kipiik ni tilee ee? Unii yaa chuun nwiin pu kan, waan gbeer ki lir; ba pu? dulnyaa ni aawihn le cha u waa. <sup>10</sup> Unii mu yaa chuun kinyeek kan, u ga gbeer ki lir; ba pu? nwiin aa ki bi u chee.” <sup>11</sup> Yesu aah len kina ki ti doo na, le u ki len ke, “Tijo Lasarus do geen. M cha m ti finn u la.”

<sup>12</sup> Le waadidiliib bui u, “Tidindaan, u yaa geen le kan, u ga pook.”

<sup>13</sup> Yesu mu aah len pu na le ye ke u kpo a. Waadidiliib ma nyi ke waah len pu na le ye ke u do geen ngeenbamom la. <sup>14</sup> Nima le Yesu nin tuk bi chob chob, “Lasarus kpo a. <sup>15</sup> Ni na mi mpopiin maah kaa nan bi u chee aan u kpo na; ba pu? nima le ga cha ni moo gaa mi ki kii. Cha ti li cha u chee man.”

16 Le waadidiliib ponn ni ubaa, u bi yin u ke Tomas ki ki yin u ke Kijaan\* na le bui biken, “Cha ti mu dii u man, bi yaa ti ku u kan, ti mu kpo u chee.”

*U fikr binib nkun ni na le ye Yesu*

17 Le bi buen. Yesu aah ti fuu Betani aatiŋ ni na, le bi bui u, “Taah sub Lasarus na, iwiin inaa le na.”

18 Jerusalem ni Betani aa daa tɔb, naa pii mal bilee.

19 Juu yaab pam le nan nyan nima, ki dan Mata ni Mari chee, bi nan sɔŋ bisui, bininja aah kpo pu na.

20 Le Mata ŋun ke Yesu choo, le u tooh u nsan ni. Mari ma beenin ka kidiik ni. 21 Le Mata ti bui Yesu, “Ndindaan, aa yaa ba bi do kan, nninja aa ba ga kpo. 22 Dandana wee mu, m nyi ke aa yaa mee Uwumbɔr tiwan nimɔk pu na kan, u ga tii si.”

23 Le Yesu bui u, “Aaninja ga fikr nkun ni.”

24 Le Mata bui u, “M nyi ke u ga nan fikr nkun ni, kookoo aataadaal, bundaln binib mɔmɔk ga fikr nkun ni na.”

25 Le Yesu bui u, “U fikr binib nkun ni, ki tii bi limɔfal na le ye min. Unii umɔk gaa mi ki kii na, u yaa kpo kan, u ga li kpa limɔfal. 26 Unii umɔk bi ki gaa mi ki kii na, waan kpo. Aa pak maah len pu na aa?”

27 Le u kii ke, “Een, Ndindaan, m pak ke aa ye Uwumbɔr Aajapɔɔn. Aa ye Kristo† u bi nan len ke u ga dan dulnyaa ni na.”

*Yesu aah wii pu na*

28 Mata aah len kina na, le u buen ti loon yin unaal Mari, le ki bui u, “Umɔmɔkr fuu ni, ki yin si.”

---

\* 11:16 : Kijaan: Baaliin ni, bi yin u ke Didimus la. † 11:27 : Hiibru aaliin ni, bi yin Kristo ke Masiya. Naatataa le ye ke unii u ga gaa binib lii na.

<sup>29</sup> Mari aah ηun kina na, le u kpaan fii mala, ki buen u chee; <sup>30</sup> Yesu aa nan kee fuu ni kitiη ni, u nan laa bi nsan ni, Mata aah tooh u nin chee na. <sup>31</sup> Juu yaab bi nan bi lidichal ni Mari chee ke bi sɔη usui na aah kan ke u kpaan fii nyan lipaal na, le bi mu fii paan u pu. Bi nan nyi ke u cha likaakul chee le u ti wii.

<sup>32</sup> Le u ti fuu Yesu aah bi nin chee na. Waah kan u na, le u gbaan unimbiin ni, ki bui u, “Ndindaan, aa yaa ba bi do kan, nninja aa ba ga kpo.”

<sup>33</sup> Le Yesu kan ke u bi wii. Juu yaab bi mu dii u na, mu bi wii. Le usui bii. Le u fuur kaa lii u ponn ni, <sup>34</sup> le ki baa bi, “Ni sub u la chee?”

Le bi bui u, “Ndindaan, dan nan lik.”

<sup>35</sup> Le Yesu wii. <sup>36</sup> Le Juu yaab bui ke, “Lik waah gee u sakpen pu na.”

<sup>37</sup> Le bibaa mu bui ke, “Uja u likr ujoon aanimbil na, waa ba ga ηmaa cha Lasarus taa kpo oo?”

*Yesu aah fikr Lasarus nkun ni pu na*

<sup>38</sup> Le Yesu ki fuur kaa lii u ponn ni, le ki ti fuu likaakul na chee. Ni nan ye kitakpadandan aakaakul la. Le litakpal lek mbisamɔb. <sup>39</sup> Le u bui bi, “Chuu lekr litakpal na man.”

Mata, u ye uja u kpo na aaninkpan na nan bui u, “Ndindaan, waah kpo na, iwiin inaa din. Naah saa pu na, u ga li nun a.”

<sup>40</sup> Le Yesu baa u, “Maa tuk si ke aa yaa gaa mi ki kii kan, aa ga kan Uwumbɔr aah kpa mpɔɔn pu na aa?” <sup>41</sup> Waah len kina na, le bi chuu lekr litakpal na. Le u waan lik paacham ki bui ke, “Nte Uwumbɔr, maah len aa chee pu na, aa ηun la. Nima le m dooni si. <sup>42</sup> M nyi ke n-yoonn mɔmɔk aa ηun maah len aa chee pu na. Kinipaak ki si do na pu, le

m len kina, ke bi pak ke sin le tun ni mi.” <sup>43</sup> Waah len kina na, le u teen mpɔɔn pu, “Lasarus, nya ni.” <sup>44</sup> Le utekpiir ngbaan fikr, ki nyan ni likaakul ni. Likekeln beenin poo unjaal, ni utaa, ni unimbil wɔb. Le Yesu bui bi, “Chuu poor likekeln ngbaan man, ki cha u li cha.”

*Baah kpokl ke bi ga ku Yesu pu na  
(Matiu 26.1-5; Mak 14.1-2; Luk 22.1-2)*

<sup>45</sup> Tɔ, Juu yaab bi dii Mari ki kan Yesu aah tun lijinjiiir aatuln ngbaan pu na, bi ponn ni pam le nan gaa u ki kii. <sup>46</sup> Bi ponn ni bibaa mu nan buen Farisii yaab chee ki ti tuk bi waah ŋa pu na. <sup>47</sup> Farisii yaab aah ŋun kina na, le bi ni Uwumbɔr aatotoorninkpiib yin bibɔjirb aaninkpiib, le bi kuun ni bi chee. Le bi baa bi, “Ti ga ŋa kinye? Uja ngbaan tun lijinjiiir aatun pam. <sup>48</sup> Ti yaa cha u beenin ŋani kina kan, binib mɔmɔk ga gaa u ki kii, le Rom yaab ga dan nan bii timi aatin, ki kuln timi aatimbol aanib mɔmɔk.”

<sup>49</sup> Bi yin bi ponn ni ubaa ke Kayafas; uma le nan ye Uwumbɔr aatotoorninkpel libiln ngbaan; le u bui biken, “Naa nyi nibaa, <sup>50</sup> kaa nyi ke ni ŋan ke uja ubaa kpo binib mɔmɔk pu, aan litimbol ngbaan mɔmɔk taa kuln.” <sup>51</sup> Waah len pu na, naa ye ubaa pu le u len. U nan ye Uwumbɔr aatotoorninkpel le libiln ngbaan. Nima pu na, Uwumbɔr Aafuur Nyaan nan cha u len ke Yesu ga kpo litimbol ngbaan aanib mɔmɔk pu. <sup>52</sup> Naa ye litimbol ngbaan baanja pu le u ga kpo. U ga kpo ki kuun Uwumbɔr aanib bi yaa ki bi ŋipepel mɔmɔk ni na, ki kpaan bi ke bi ŋa unibaan.

<sup>53</sup> Uwumbər aatotoorninkpel ngbaan aah len kina na, liyaadaal ngbaan ki joo cha, bi nan kpokl baah ga ɲa pu ki ku Yesu na. <sup>54</sup> Nima pu le Yesu aa nan ki chuun mpaan pu Juu yaab aatiŋ ni. U nan nyan nima ki buen kitin kibaa ni, bi yin ki ke Efraim, le u ni waadidiliib ti bi nima. Kaa daa nteersakpiin chee.

<sup>55</sup> Tɔ, ni nan gur siib le Juu yaab ji njim mu bi yin mu ke Lakr-jer aajim na.† Njim aawiin aa nan kee fuu, le kinipaak nyan itingbaan ni ki buen Jerusalem, bi ti ɲa bibaa chain. <sup>56</sup> Le bi ban Yesu. Baah si Uwumbər Aadichal ni na, le bi baa tɔb, “Ni dak kinye? U ga tee dan njim mue ni aan waan dan?” <sup>57</sup> Le Uwumbər aatotoorninkpiib ni Farisii yaab nan bui bi ke unii ubaa yaa nyi waah bi nin chee na kan, u mək bi, aan bi buen ti chuu u.

## 12

*Upii ubaa aah nyun Yesu pu na  
(Matiu 26.6-13; Mak 14.3-9)*

<sup>1</sup> Tɔ, ni nan gur iwiin iloob le Juu yaab ji Lakr-jer aajim ngbaan, le Yesu buen Betani aatiŋ ni. Lasarus, u Yesu nan fikr u nkun ni na, mu nan bi nima. <sup>2</sup> Le bi ɲa tijikaar ti ɲan na nima tii Yesu. Mata nan yoor tijikaar ngbaan siin bi. Lasarus nan ye binib bi nan ji Yesu chee tijikaar na ponn ni ubaa. <sup>3</sup> Le Mari yoor tulalee u kpa kidaak sakpen na kpalba ubaa, ki di ɲmir Yesu aataa, ki di uyikipir per utaa. Tulalee ngbaan aah nu mɔ na, waabaam gaa kidiik ni. Bi yin tulalee ngbaan ke

---

† **11:55** : Israel yaab nan ji Lakr-jer aajim ke bi teer buyoonn Uwumbər nan nyan bi tinaagbiir ni, Ijpt aatiŋ ni na. Lik Nnyam 12.1-27.

naad. <sup>4</sup> Le Yesu aadidiliib ponn ni ubaa, bi yin u ke Judas Iskariot, u ga nan kooh Yesu na, baa ke, <sup>5</sup> “Ba ɲa baa di tulalee ngbaan kooh ki kan ɲimombil ɲi ɲeer iwiin ikui itaa aapal ki di tii bigiim?” <sup>6</sup> Judas aatafal aa nan bi bigiim ni. U nan ye unaayuk la, ki nan ye unii u joo ɲimombil aataakɔr na, ki su baah di ɲimombil ɲi ɲa li ponn ni na. Nima le cha u len kina.

<sup>7</sup> Le Yesu bui Judas, “Di cha Mari. U joo tulalee wee u toor mi kiir maasub daal la. <sup>8</sup> Bigiim ga li bi ni chee n-yoonn mɔmɔk. Mma aan li bi ni chee n-yoonn mɔmɔk.”

*Baah kpokl ke bi ga ku Lasarus pu na*

<sup>9</sup> Tɔ, Juu yaab pam nan ɲun ke Yesu bi Betani aatinj ni, le ki choo u chee. Naa ye Yesu baanja pu le bi dan. Bi nan ban bi kan Lasarus, u Yesu nan fikr u nkun ni na mu. <sup>10</sup> Nima pu le Uwumbɔr aatotoorninkpiib kpokl ke bi ga ku Lasarus mu; <sup>11</sup> ba pu? u pu le Juu yaab pam gaa Yesu ki kii, kaa ki dii bima Uwumbɔr aatotoorninkpiib.

*Jerusalem aanib aah nyun Yesu pu na*

*(Matu 21.1-11; Mak 11.1-11; Luk 19.28-40)*

<sup>12</sup> Ki woln kitaak le kinipaak ki bi Jerusalem ke bi ti ji njim na ɲun ke Yesu choo. <sup>13</sup> Le bi yoor tibɔkpafar ki ti tooh u nsan ni, le ki tar, “Hosiana,\* Uwumbɔr ɲa tinyoor ɲa unii u choo waayimbil ni na pu. Uwumbɔr ɲa tinyoor ɲa Israel yaab Aabɔrkpaan pu.”†

<sup>14</sup> Le Yesu kan ubonsal ki diɲ u pu ke Uwumbɔr Aagbanj aah len pu na ke,

\* **12:13** : Hosiana aataata le ye ke “Gaa timi lii.” † **12:13** : Lik Ilahn 118.25, 26.

15 “Sionn aatiŋ aanib, taa san ijawaan man.  
Lik man, nimi Aabər kpaan choo  
ki dik ubon u laa diin na pu.”

16 Kinipaak ngbaan aah tooh Yesu nsan pu kina na, n-yoonn ngbaan le waadidiliib aa bee naatataa. Uwumbər aah yoor Yesu paacham na, n-yoonn ngbaan le bi teer ke ni ŋmee Uwumbər Aagbaŋ ni ke bi ga ŋa u kina, le ki teer kinipaak ngbaan aah nan ŋa u pu na.

17 Kinipaak ki nan bi Yesu chee bundaln u yin Lasarus ke u nyan likaakul ni ki fikr u nkun ni na le nan mooni tibər ngbaan. 18 Le binib pam ŋun waah tun lijinjiir aatuln ngbaan pu na. Nima le cha bi tooh u nsan ni. 19 Farisii yaab aah kan kina na, le bi bui tɔb, “Ni kan aa? Taa ki kpa tinyoor tibaa. Dulnyaa ni aanib məmək dii uma la.”

*Griik yaab bibaa aah ban Yesu pu na*

20 Binib bi dan Jerusalem bi nan ji njim ngbaan ki doon Uwumbər na, bi ponn ni bibaa nan ye Griik yaab. 21 Le bi dan Filip chee. Filip nan ye Betseda aatiŋ ki bi Galilee aatiŋ ni na aanii la. Le bi bui u, “Uninkpel, ti ban ti kan Yesu.”

22 Le Filip buen ti tuk Andru. Le bi məmək bilee buen ti tuk Yesu. 23 Le u bui bi, “Buyoonn Uwumbər ga yoor min Unibən Aabo paacham na fuu ni a. 24 M tuk nimi mbamən la, bi yaa di lidibil libaa bun kan, li ga kpo le ki nin ŋa tijikaar sakpen; bi yaa kaa di li bun kan, laan kpo, ki mu aan ŋa tijikaar, li ga li ye libil libaa la. 25 Unii umək gee waaməfal ki jer min Yesu na, waaməfal ga bee yoli la. Unii umək gee min ki jer waaməfal dulnyaa wee ni na, u ga li kpa liməfal li kaa kpa ndoon

na, kaan bee yɔli. <sup>26</sup> Unii yaa ban ke u tun lituln tii mi kan, udaan li dii mi. Maah bi nin chee na, maatutunn mu ga li bi nima. Unii yaa tun lituln tii mi kan, Nte Uwumbɔr ga nyuŋ udaan.”

*Yesu aah len waakun aabɔr pu na*

<sup>27</sup> “Dandana, nsui bii sakpen a. M ga len kinye? M ga len ke, ‘Nte, nyan mi falaa u choo na ni ii?’ Maan len kina; ba pu? ɲitaa ɲi pu m dan dulnyaa wee ni na le ye ke m ji falaa ngbaan. <sup>28</sup> Nte, cha binib nyuŋ si.”

Waah len kina na, le nneel nyan ni paacham ki len ke, “M cha bi nyuŋ mi, ki ga ki cha bi nyuŋ mi.”

<sup>29</sup> Kinipaak ki si u chee ki ɲun nneel ngbaan pu na, bi ponn ni bibaa nan bui ke utaal le gbenni, biken mu bui ke Uwumbɔr aatuun le len u chee.

<sup>30</sup> Le u bui bi, “Nneel ngbaan aa len m chee min baanja pu la. Mu len ni mu pu la. <sup>31</sup> Dandana wee, Uwumbɔr ga ji dulnyaa wee ni aanib tibɔr, ki ga jenn nyan kinimbɔŋ ki ye dulnyaa aanib aayidaan na, ki ɲa ki yɔli. <sup>32</sup> Bi yaa yoor mi kitin paacham kan, m ga daa foor binib mɔmɔk dan mbaa chee.” <sup>33</sup> U nan len kina ke bi bee waah ga kpo pu na.

<sup>34</sup> Le kinipaak ngbaan bui u, “Ti ɲun Uwumbɔr Aagban len ke Kristo u ga gaa timi lii na ga li bi n-yoonn mɔmɔk. Aa ɲa kinye ki len ke bi ga yoor Unibɔn Aabo kitin paacham? Nma ye Unibɔn Aabo ngbaan?”

<sup>35</sup> Le u bui bi, “Min u ye nwiihn na, maan ki li bi nikaasisik ni, ni yunn. Dii nwiihn mu aah laa bi pu na man, aan mbɔmbɔɔn taa pii nimi. Unii umɔk chuun mbɔmbɔɔn ni na kan, waa nyi waah cha niwɔb na. <sup>36</sup> Buyoonn min u ye nwiihn na laa



bi ni chee na, gaa mi ki kii man, aan ki ŋa nwiihn ni aabim.”

*Juu yaab aah kaa gaa Yesu ki kii pu na*

Yesu aah len kina na, le u nyan nima ki b̄or ke bi taa ki kan u. <sup>37</sup> U nan tun lijnjiir aatun pam binimbil ni. Bi mu aa nan gaa u ki kii. <sup>38</sup> Baa gaa u ki kii, aan ni gbiin Uwumb̄or aab̄onabr Aisaya aah nan len pu na ke,

“Uwumb̄or, ŋma pak taah len pu na?

Ŋma bee saah kpa mp̄oɔn pu na?”†

<sup>39</sup> Aisaya aah len kina na, le baa ŋmaa gaa Yesu ki kii; Aisaya mu ki len ke,

<sup>40</sup> “Uwumb̄or j̄ob binimbil ke bi taa li waa; ki cha bitafal p̄oɔ, bi taa bee waaliin aatataa, ki taa fenn dan uw̄ob ke u tii bi laafee.”§

<sup>41</sup> Aisaya nan len kina; ba pu? u nan kan Yesu aah nyuun sakpen pu na, le ki len waab̄or.

<sup>42</sup> T̄o, Juu yaab aaninkpiib pam nan gaa Yesu ki kii; Farisii yaab pu, le baa len lipaal ke bi gaa u ki kii. Bi yaa len ke bi gaa u ki kii kan, Farisii yaab ngbaan ga nyan bi mmeen aadiik ni. <sup>43</sup> Nima le m̄ok ke Juu yaab aaninkpiib ngbaan gee binib aapak ki jer Uwumb̄or yaan.

*Tib̄or aajim aah ga li bi pu na*

<sup>44</sup> Le Yesu teen ke, “Unii um̄ok gaa mi ki kii na kan, naa ye min baanja le u gaa ki kii, u gaa u tun ni mi na mu ki kii. <sup>45</sup> Unii um̄ok kan mi na kan, u kan Uwumb̄or u tun ni mi na mu. <sup>46</sup> M ye nwiihn le ki dan dulnyaa ni ke m nan woln binib aanimbil, aan unii um̄ok gaa mi ki kii na kan, waan ki li

† 12:38 : Lik Aisaya 53.1. § 12:40 : Lik Aisaya 6.10.

bi mbɔmbɔɔn ni. <sup>47</sup> Unii yaa n̄un maaliin, ki yaa kaa kii i kan, maan ji u tibɔr; maa dan ke m nan ji dulnyaa ni aanib tibɔr, m dan ke m gaa bi lii la. <sup>48</sup> Unii umək yii mi, kaa gaa maaliin na kan, tiwan nibaa bi ki ga mək ke waabɔr bii a. Kookoo aataadaal kan, maaliin le ga mək ke waabɔr bii, <sup>49</sup> ba pu? maa len mbaa pu. Nte Uwumbɔr u tun ni mi na, uma le tuk mi maah ga len pu na. <sup>50</sup> M bee ke unii umək kii waaliin na ga li kpa limɔfal li kaa kpa ndoon na. Nima pu na, waah tuk mi pu na, m len kina la.”

## 13

### *Yesu aah finn waadidiliib aataa pu na*

<sup>1</sup> Ni nan ye kitaak ki ga nan ji aan ki woln Lakr-jer aajim\* daal na. Le Yesu nyi ke ni n̄eer u nya dulnyaa wee ni, ki buen Ute Uwumbɔr chee. N-yoonn məmək u nan gee waanib bi bi dulnyaa ni na. U gee bi mbaməm ki ti saa ndoon.

<sup>2</sup> Le ni n̄eer bi ji kijook aajikaar. Le kinimbɔn dan nan koo Judas Iskariot u ye Simonn aajapɔɔn na aasui ni ke u kooh Yesu. <sup>3</sup> Yesu nyi ke Ute Uwumbɔr tii u mpɔɔn məmək, ki nyi ke u nyan ni Uwumbɔr chee, ki ga ki gir buen u chee la. <sup>4</sup> U ni waadidiliib nan kal ke bi ji tijikaar, le u fii sil, ki chuu peer waawanpeenkaan, ki di linaapuul buu uchan̄ ni, <sup>5</sup> le ki ban nnyun n̄a lisambil ni, ki piin ki bi finni waadidiliib aataa, ki joo linaapuul li bi uchan̄ ni na per bitaa. <sup>6</sup> Waah ti fuu Simonn Piita chee na le

---

\* **13:1** : Israel yaab nan ji Lakr-jer aajim ke bi teer buyoonn Uwumbɔr nan nyan bi tinaagbiir ni, Ijipt aatin̄ ni na. Lik Nnyam 12.1-27.

Simonn Piita bui u, “Ndindaan, sin le tee labr finn ntaa aa?”

<sup>7</sup> Le Yesu bui u, “Dandana, saa bee maah ηani pu na aatataa. N-yoonn choo le aa ga nan bee.”

<sup>8</sup> Le Piita bui u, “Saan finn ntaa daalbaadaal.”

Le Yesu bui u, “M yaa kaa finn aataa kan, saan ki li ye maanii.”

<sup>9</sup> Le Simonn Piita bui u, “Ndindaan, kina kan, taa finn ntaa baanja. Finn ηjaal ni n-yil mu.”

<sup>10</sup> Le Yesu bui u, “Unii yaa fu nnyun kan, waan ki li ban u finn uwon, see utaa baanja le u ga finn; ba pu? uwon məmək bi chain. Tə, nimi le bi chain; ni mu aa ye ni məmək.” <sup>11</sup> Yesu nyi ke udaan u ga kooh u na bi bi ponn ni, nima le cha u len ke naa ye bi məmək le bi chain.

<sup>12</sup> Waah finn bitaa ti doo, ki ki peen waawan-peenkaan, ki gir kal waakakaa chee na, le u baa bi, “Ni bee maah ηa pu na aatataa aa? <sup>13</sup> Ni yin mi ke Uməmək, ki ki yin mi ke Nidindaan. Ni len mbamən la; ba pu? m ye kina la. <sup>14</sup> Tə, min u ye Nidindaan ni nimi Aaməmək na aah finn nitaa pu na, ni ηan ke ni mu li finni təb aataa kina. <sup>15</sup> M mək nimi liməkl la, ke ni mu li ηani təb ke maah ηa nimi pu na. <sup>16</sup> M tuk nimi mbamən la, unaagbiija ubaa aa jer udindaan. Unii u bi tun ni u na ubaa aa jer unii u tun u na. <sup>17</sup> Ni yaa bee maah len pu na aatataa, ki yaa ηani kina kan, ni ga li kpa mpopiin.

<sup>18</sup> “Maa len ni məmək pu. M nyi maah nyan bi na aasui ni aah bi pu na, ki nyan nimi ke ni gbiin Uwumbər Aagban aah len pu na ke, ‘M ni unii u kpaan ni ji lisambil ni na, uma le fii sil m pu.’† <sup>19</sup> M tuk nimi tiwan ni kaa kee ηa na aabər dandana, ke

---

† 13:18 : Lik Ilahn 41.9.

ni yaa nan ŋa kan, ni ga pak ke m ye maah ye u na. <sup>20</sup> M tuk nimi mbamɔn la, unii yaa gaa maah ga tun unii u na, u gaa mi le na. Unii yaa gaa mi kan, u gaa Uwumbɔr u tun ni mi na le na.”

*Yesu aah tuk bi ke bi ponn ni ubaa ga kooh u pu na*

*(Matiu 26.20-25; Mak 14.17-21; Luk 22.21-23)*

<sup>21</sup> Yesu aah len kina na, le usui bii sakpen. Le u bui bi, “M tuk nimi mbamɔn la, ni ponn ni ubaa ga kooh mi.”

<sup>22</sup> Le waadidiliib lik tɔb, kaa bee waah len u na.

<sup>23</sup> Waadidiliib ponn ni ubaa, u Yesu gee u na nan ka gbɔk u ki ji tijikaar. <sup>24</sup> Le Simonn Piita di unjaal mɔk u ke u baa Yesu ke u len ŋma.

<sup>25</sup> Le u didiir ngbaan foor duun Yesu ki baa u, “Ndindaan, ŋma ye?”

<sup>26</sup> Le Yesu bui u, “M yaa war bisaa, ki di ŋa tikpin ni, ki di tii u na kan, uma le na.” Waah len kina na, le u war bisaa ki di ŋa tikpin ni, ki di tii Judas, u ye Simonn Iskariot aajapɔn na. <sup>27</sup> Judas aah gaa bisaa ngbaan na, le kinimbɔŋ koo usui ni. Le Yesu bui u, “Saah ga ŋa pu na kan, ŋa mala.” <sup>28</sup> Binib bi nan bi ji tijikaar na ponn ni ubaa aa nyi ŋitaa ŋi pu Yesu tuk u kina na. <sup>29</sup> Judas le joo ŋimombil aataakɔr. Nima pu le bibaa dak ke Yesu tuk u ke u buen ti daa baah ban ŋjim aajikaar ti na la. Le biken mu dak ke Yesu tuk u ke u buen ti tii bigiim le ŋimombil.

<sup>30</sup> Judas aah gaa bisaa ngbaan na, libuul ngbaan ni le u nyan kidiik ni. Ni nan ye kinyeek la.

*Yesu aah tii bi nkaal pɔn pu na*

<sup>31</sup> Judas aah nyan na, le Yesu bui bi, “Dandana, Uwumbər ga nyuŋ min Unibən Aabo. M pu, le binib ga nyuŋ Uwumbər. <sup>32</sup> Bi yaa nyuŋ Uwumbər m pu kan, Uwumbər mu ga nyuŋ mi ubaa chee. U ga nyuŋ mi dandana wee la. <sup>33</sup> Maabim, m ga li bi ni chee ni yunn siib la. Ni ga li ban mi. Maah nan tuk Juu yaab pu na, kina le m ki tuk ni mu dandana, ke naan ŋmaa buen maah cha nin chee na. <sup>34</sup> M tii nimi nkaal pəən la, ke ni li gee təb. Maah gee nimi pu na, ni mu li gee təb kina. <sup>35</sup> Ni yaa gee təb kan, nima le ga cha binib məmək bee ke ni ye maadidiliib.”

*Yesu aah bui ke Piita ga nee u pu na  
(Matu 26.31-35; Mak 14.27-31; Luk 22.31-34)*

<sup>36</sup> Le Simonn Piita baa u, “Ndindaan, aa ga buen la chee?”

Le Yesu bui u, “Maah cha nin chee na, saan ŋmaa dii mi dandana. N-yoonn choo, le aa ga nan buen.”

<sup>37</sup> Le Piita baa u, “Ndindaan, ba pu maan ŋmaa dii si dandana? M ga ŋmaa kpo aa pu.”

<sup>38</sup> Le Yesu baa u, “Aa ga sil ŋmaa kpo m pu uu? M tuk si mbamən la, aa ga len nfum mutaa ke saa nyi mi, le ukooja nin wii.”

## 14

*Yesu le ye nsan mu cha Uwumbər chee na*

<sup>1</sup> “Ni taa cha ilandak li muk nimi. Ni gaa Uwumbər ki kii man, ki gaa m mu ki kii man. <sup>2</sup> Tidir wiir Nte Uwumbər do. Ti yaa kaa ba wiir kan, m ba ga tuk nimi. M cha m ti toor nkookoo yaan ki kiir nimi la. <sup>3</sup> M yaa buen ti toor nkookoo yaan ki kiir nimi kan, m ga gir ni, ki nan yoor nimi

buen mbaa chee, ni ti li bi maah ga li bi nin chee na. <sup>4</sup> Ni nyi maah cha nin chee na aasan.”

<sup>5</sup> Le Tomas bui u, “Ndindaan, taa nyi saah cha nin chee na. Ti ga ŋa kinye ki li nyi nsan mu cha nima na?”

<sup>6</sup> Le Yesu bui u, “Min le ye nsan ngbaan, ni mbamɔn, ni limɔfal. Ubaa aan dan Nte Uwumbɔr chee, see u dii mi. <sup>7</sup> Ni yaa ba nyi mi kan, ni ba ga li nyi Nte Uwumbɔr mu. Dandana ni nyi u, ki kan u.”

<sup>8</sup> Le Filip bui u, “Ndindaan, mɔk timi Aate. Nima le tinimbil ga gbiin.”

<sup>9</sup> Le Yesu baa u, “Filip, m bi ni chee ni yunn kina, le saa bee mi ii? Unii umɔk kan mi na, u kan Nte Uwumbɔr mu le na. Ba pu aa bui mi ke m mɔk nimi Nte? <sup>10</sup> M bi Nte Uwumbɔr ni, Nte Uwumbɔr mu bi m ni. Saa pak kina aa? Maah tuk nimi iliin i na, maa len mbaa pu. Nte Uwumbɔr u bi m ni na le cha m tun waatuln.

<sup>11</sup> “Ni li pak ke m bi Nte Uwumbɔr ni, Nte Uwumbɔr mu bi m ni. Ni yaa kaa pak maah len pu na kan, gaa mi ki kii lituln ngbaan pu man. <sup>12</sup> M tuk nimi mbamɔn la, unii umɔk gaa mi ki kii na kan, u ga tun lituln ke maah tun pu na. U mu ga tun lituln li jer lituln ngbaan na; ba pu? m cha Nte Uwumbɔr chee la. <sup>13</sup> Ni yaa mee Uwumbɔr tiwan nimɔk maayimbil pu na kan, m ga ŋa naah ban pu na tii nimi, aan binib nyun Uwumbɔr, min Ujapɔɔn pu. <sup>14</sup> Ni yaa mee mi tiwan maayimbil pu kan, m ga ŋa naah ban pu na tii nimi.”

*Uwumbɔr Aafuur Nyaan aah ga fuu ni pu na*

<sup>15</sup> “Ni yaa gee mi kan, ni ga kii maamɔb, <sup>16</sup> le m ga mee Nte Uwumbɔr, le u ga tii nimi Uteter uken, u li

bi ni chee n-yoonn məmək. <sup>17</sup> Uma le ye Uwumbər Aafuur Nyaan mu ye mbamən na. Dulnyaa aanib aa ŋmaa gaa mu; ba pu? baa waa mu, ki mu aa nyi mu. Nimi le nyi mu; ba pu? mu bi ni chee, ki ga li bi ni ni.

<sup>18</sup> “Maan di nimi lii nibaa. M ga gir ni ni chee. <sup>19</sup> Ni gur siib le dulnyaa aanib aan ki kan mi. Nimi le ga kan mi. Maah kpa liməfal na, nima pu le ni mu ga li kpa liməfal. <sup>20</sup> Liyaadaal ngbaan le ni ga bee ke m bi Nte Uwumbər ni, le ni mu bi m ni, le m mu bi ni ni.

<sup>21</sup> “Unii umək nyi maakaal ki kii mu na, uma le gee mi. Unii yaa gee mi kan, Nte Uwumbər ga li gee udaan ngbaan. M mu ga li gee u, ki ga di mbaa mək u.”

<sup>22</sup> Le Judas uken na, naa ye Judas Iskariot, baa u, “Ndindaan, ba pu aa ga di aabaa mək timi, kaan di mək dulnyaa ni aanib?”

<sup>23</sup> Le Yesu bui u, “Unii yaa gee mi kan, u ga kii maaliin, le Nte Uwumbər ga li gee u, le ti ga dan u chee, ki ga li bi u chee. <sup>24</sup> Unii yaa kaa gee mi kan, waan kii maaliin. Maah tuk nimi iliin i na aa ye maaliin, i ye Uwumbər u tun ni mi na aaliin la.

<sup>25</sup> “Maah laa bi ni chee na, le m tuk nimi tibər timina. <sup>26</sup> Nte Uwumbər ga tun ni Uteter, maayim-bil pu. Uteter ngbaan ye Waafuur Nyaan la. Uma le ga mək nimi tibər məmək aatataa, ki ga teer nimi maah tuk nimi tibər timək na.

<sup>27</sup> “M tii nimi nsuudoon la. Maah kpa nsuudoon pu na, kina le m tii nimi. Dulnyaa aawan aa ŋmaa tii nimi nsuudoon ke maah tii nimi pu na. Ni taa cha ilandak li muk nimi, ki taa san ijawaan man.

<sup>28</sup> Ni ŋun m len ke m ga buen ki ga ki gir ni, ni chee.

Ni yaa gee mi kan, ni ba ga li kpa mpopiin ke m buen Nte Uwumbɔr chee; ba pu? Nte jer mi. <sup>29</sup> M tuk nimi tiwan ni kaa kee ɲa na aabɔr dandana, ke ni yaa nan ɲa kan, ni gaa mi ki kii. <sup>30</sup> Maan ki len ni chee tibɔr ni yunn; ba pu? dulnyaa wee aayidaan kinimbɔɲ le choo. Ki mu aan ɲmaa ɲa mi nibaa. <sup>31</sup> M ban ke dulnyaa ni aanib bee ke m gee Nte Uwumbɔr, nima le m ɲani waah tuk mi pu na mɔmɔk.

“Fiin, ti li cha man.”

## 15

### *Yesu aah ye lisupuul bamɔnn pu na*

<sup>1</sup> “Min le ye ndaan aasubil aasupuul bamɔnn na. Nte Uwumbɔr le ye ukpaal u lik busub ngbaan na. <sup>2</sup> Ibon imɔk bi m pu kaa lu ɲisubil na, u ga per i lii. Ibon imɔk lu ɲisubil na, u ga toor i, i moo lu ɲisubil. <sup>3</sup> Maah tuk nimi maaliin na, ima le toor nimi aabimbin. <sup>4</sup> Ni li kpaan m chee man, m mu kpaan ni chee. Mbon yaa bi mubaa, kaa tuu busub pu kan, mu aan ɲmaa lu ɲisubil. Kina le ni mu yaa kaa kpaan m chee kan, naan ɲmaa li ɲani tinyoor tii Uwumbɔr.

<sup>5</sup> “Min le ye lisupuul ngbaan. Le ni ye ibon. Unii umɔk kpaan m chee, m mu kpaan u chee na, udaan ngbaan ɲani tinyoor sakpen tii mi; ni mu yaa kaa kpaan m chee kan, naan ɲmaa ɲa nibaa. <sup>6</sup> Unii yaa kaa kpaan m chee kan, u ga ɲa yɔli ke mbon mu kaa tuu busub pu na aah kuur pu na la. Le Uwumbɔr ga mee u lii ke binib aah peei ibokuun pu ki joo tuur mmii na. <sup>7</sup> Ni yaa kpaan m chee, ki yaa joo maaliin nisui ni kan, mee Uwumbɔr naah ban pu na man, le u ga ɲa



kina tii nimi. <sup>8</sup> Ni yaa ɲani tinyoor sakpen tii Nte Uwumbɔr kan, nima le ga nyuɲ u, ki ga mɔk ke ni sil ye maadidiliib. <sup>9</sup> Nte Uwumbɔr aah gee mi pu na, kina le m mu gee nimi. Ni li beenin ye maah gee bi na. <sup>10</sup> M ɲani Nte Uwumbɔr aah tuk mi pu na, le u beenin gee mi. Ni mu yaa ɲani maah tuk nimi pu na kan, m mu ga li beenin gee nimi.

<sup>11</sup> “M tuk nimi tibɔr timina ke ni li kpa mpopiin ke maah kpa pu na. M ban ke ni li kpa mpopiin mbamɔm. <sup>12</sup> Maakaal le ye ke ni li gee tɔb ke maah gee nimi pu na. <sup>13</sup> Unii yaa kpo uɲɔtiib pu kan, ubaa aa ki bi, ki kpa ngeehm ki ti jer kina. <sup>14</sup> Ni yaa ɲani maah tuk nimi pu na kan, ni ye nɲɔtiib la. <sup>15</sup> Maan ki yin nimi ke bitutum; m yin nimi ke nɲɔtiib la. Ututunn aa nyi udindaan aabɔr mɔmɔk; m tuk nimi tibɔr timɔk m ɲun Nte Uwumbɔr chee na. <sup>16</sup> Nimi le aa nyan mi. Min le nyan nimi, ki siin ke ni li ɲani tinyoor ti ga li bi n-yoonn mu kaa kpa ndoon na, ke ni yaa mee Nte Uwumbɔr tiwan maayimbil pu kan, u ga tii nimi. <sup>17</sup> Ni li gee tɔb. Maah tii nimi nkaal mu na le na.”

*Dulnyaa aanib aah ga li nan Yesu aanib pu na*

<sup>18</sup> “Dulnyaa aanib yaa nan nimi kan, ni li nyi ke bi puen nan mi la, le ki nin nan ni mu. <sup>19</sup> Ni yaa ba ye dulnyaa yaab kan, dulnyaa yaab ba ga li gee nimi ke baah gee tɔb pu na; ni mu aa ye dulnyaa yaab. M nyan nimi dulnyaa ni aanib aakaasisik ni, nima le cha dulnyaa yaab nan nimi. <sup>20</sup> Teer man maah nan tuk nimi pu na ke, ‘Unaagbiija ubaa aa jer udindaan.’ Bi yaa nan ɲa mi falaa kan, bi ga ɲa ni mu falaa. Bi yaa nan kii maaliin kan, bi ga kii nimi aaliin mu. <sup>21</sup> Baa nyi Uwumbɔr u tun ni

mi na. Nima le bi ga ŋa nimi falaa m pu. <sup>22</sup> M yaa kaa ba dan dulnyaa ni ki nan tuk bi maabɔr kan, baa ba ga li kpa taani; naah bi pu na, bi kpa taani; ba pu? maah tuk bi maabɔr na, baan ki ŋmaa len ke baa nyi ti. <sup>23</sup> Unii yaa nan mi kan, naa ye min baanja le u nan, u nan Nte Uwumbɔr mu la. <sup>24</sup> M tun lijinjiir aatun binimbil ni. Ubaa aa ki bi, ki ga ŋmaa tun lijinjiir aatun kina. M yaa kaa ba tun lijinjiir aatun ngbaan binimbil ni kan, baa ba ga li kpa taani; naah bi pu na, bi kpa taani; ba pu? bi kan maah tun pu na, ki nan m ni Nte Uwumbɔr mɔk. <sup>25</sup> Bi nan timi kina ke ni gbiin Uwumbɔr Aagban aah len pu na ke, ‘Bi po nan mi fam la, naa ye ke m ŋa bi nibaa.’\*

<sup>26</sup> “Tɔ, Uteter na ga fuu ni. Uma le ye Nte Uwumbɔr Aafuur Nyaan mu ye mbamɔn, ki nyan ni Uwumbɔr chee na. Min le ga tun ni mu ni chee. Muma le ga nan tuk nimi maabɔr. <sup>27</sup> Ni mu ga tuk binib maabɔr; ba pu? ni nan bi m chee, maah piin maatuln buyoonn ki nan saa dandana na.

## 16

<sup>1</sup> “M tuk nimi binib aah ga nan ŋa nimi falaa pu na, ke ni yaa nan ŋa kan, ni taa gir puwɔb. <sup>2</sup> Bi ga nyan nimi mmeen aadir ni; n-yoonn mbaa mu choo, unii yaa ku nimi kan, u ga li dak ke u tun Uwumbɔr aatuln le na. <sup>3</sup> Baa nyi Nte Uwumbɔr, kaa nyi m mu. Nima le ga cha bi ŋa nimi kina. <sup>4</sup> M tuk nimi baah ga ŋa nimi pu na, ke n-yaayoonn yaa nan fuu ni kan, ni ga teer ke m nan tuk nimi kina.”

### *Uwumbɔr Aafuur Nyaan aatuln*

\* **15:25** : Lik Ilahn 35.19; 69.4.

“Maah nan bi ni chee na, nima le cha maa nan puen tuk nimi tibər tee. <sup>5</sup> Dandana, m ga ki gir buen u tun ni mi na chee, le ni ponn ni ubaa aa baa mi ke m cha la chee. <sup>6</sup> Maah bui ke m ga buen cha nimi na, nima pu le nisui bii sakpen. <sup>7</sup> M tuk nimi mbamən la, m yaa buen kan, ni ηan ki tii nimi; ba pu? m yaa kaa buen kan, Uteter ngbaan aan dan. M yaa buen kan, m ga tun ni u ni chee. <sup>8</sup> U yaa fuu ni kan, u ga mək dulnyaa ni aanib ke bi ye titunwanbirdam, ki ga mək bi ke m ye uninyaan la, ki ga mək bi ke Uwumbər ga ji bi tibər. <sup>9</sup> U ga mək bi ke bi ye titunwanbirdam; ba pu? baa gaa mi ki kii. <sup>10</sup> U ga mək bi ke m ye uninyaan la; ba pu? m ga buen Nte Uwumbər chee, le naan ki kan mi. <sup>11</sup> U ga mək bi ke Uwumbər ga ji bi tibər; ba pu? u jin kinimbəŋ ki ye dulnyaa wee ni aayidaan na tibər.

<sup>12</sup> “M kpa tibər pam ki ga tuk nimi; ti mu ye nnan aabər la, naan ηmaa gaa ti dandana. <sup>13</sup> Uwumbər Aafuur Nyaan mu ye mbamən na yaa nan fuu ni kan, mu ga tuk nimi mbamən məmək; mu aan len mubaa pu; mu aah ηun Uwumbər chee ti na, tima le mu ga len, ki ga tuk nimi budabu ga nan ηa n-yoonn mu choo na na. <sup>14</sup> Mu ga nyuŋ mi; mu ga di maabər tuk nimi. <sup>15</sup> Nte Uwumbər aabər məmək ye maabər la. Nima le cha m bui nimi ke mu ga di maabər tuk nimi.”

### *Mpombiin ni mpopiin pu*

<sup>16</sup> “Ni yaa kpee siib kan, naan ki kan mi. Le ni ki kpee siib kan, ni ga ki kan mi.”

<sup>17</sup> Le waadidiliib bibaa baa təb, “Waah len pu na aatataa ye kinye? U bui ke ni yaa kpee siib kan, taan ki kan u, ni ki kpee siib kan, ti ga ki kan u, ki

bui ke u ga buen Ute Uwumbər chee. <sup>18</sup> ‘Ni kpee siib’ aatataa ye kinye? Taa nyi waah len pu na aatataa.”

<sup>19</sup> Le u bee ke bi ban bi baa u tibər ngbaan aatataa. Le u bui bi, “M len ke ni yaa kpee siib kan, naan ki kan mi, ni ki kpee siib kan, ni ga ki kan mi. Ni baa tɔb maah len pu na aatataa la aa? <sup>20</sup> M tuk nimi mbamən la, nimi le ga li kaani ki wii; dulnyaa aanib ma ga li kpa mpopiin. Ni ga li kpa mpombiin; nimi aapombiin ngbaan mu ga nan kpaln mpopiin. <sup>21</sup> Upii yaa ban u maa ubo kan, u ga li kpa mpombiin waafalaa pu. U ti ma ubo doo kan, waan ki teer falaa ngbaan aabər, u ga li kpa mpopiin la; ba pu? unipɔɔn koo ni udo. <sup>22</sup> Ni bi kina le ni mu chee. Dandana, ni kpa mpombiin la. M ni nimi ga nan ki kan tɔb, le ni ga li kpa mpopiin. Ubaa aan ŋmaa nyan mpopiin ngbaan nisui ni.

<sup>23</sup> “Liyaadaal ngbaan, naan ki baa mi tiwan nibaa pu. M tuk nimi mbamən la, ni yaa mee Nte Uwumbər tiwan nimək maayimbil pu na kan, u ga tii nimi. <sup>24</sup> Naa kee mee Uwumbər tiwan nibaa maayimbil pu, ki nan saa din. Ni li mee u, le ni ga kan, ki li kpa mpopiin mbaməm.”

### *Yesu aah nyan dulnyaa pu na*

<sup>25</sup> “M ŋakl ŋiyatanək le ki tuk nimi tibər timina. N-yoonn choo, maan ki ŋakl ŋiyatanək tuk nimi. M ga di iliin i diin na le tuk nimi Nte Uwumbər aabər. <sup>26</sup> Liyaadaal ngbaan le ni ga mee Uwumbər maayimbil pu. Maa len ke m ga mee Nte Uwumbər ki tii nimi; <sup>27</sup> uma ubaa le gee nimi; ba pu? ni gee mi, ki pak ke m nyan ni u chee. <sup>28</sup> Tɔ, m nyan ni Nte

Uwumbər chee, le ki dan dulnyaa ni. Dandana, m ga nya dulnyaa ni, ki gir buen Nte Uwumbər chee.”

<sup>29</sup> Le waadidiliib bui u, “Dandana, aa len iliin i diin na. Saa ki ɲakl ɲiyataɲak. <sup>30</sup> Dandana ti bee ke aa nyi tiwan məmək. Binib aa kee baa si, le aa bee baah ban bi baa si pu na. Nima le cha ti pak ke aa nyan ni Uwumbər chee.”

<sup>31</sup> Le u baa bi, “Ni sil gaa mi ki kii dandana wee la aa? <sup>32</sup> N-yoonn mbaa choo, ki mu fuu ni a, le ni məmək ga yaa, ki kun, ki cha mi mbaa; m mu aa bi mbaa, Nte Uwumbər bi m chee. <sup>33</sup> M tuk nimi tibər timina ke ni li kpa nsuudoon m pu. Ni ga kan falaa dulnyaa ni. Ni li kpa lipobil man; ba pu? m nyan dulnyaa a.”

## 17

### *Yesu aah mee Uwumbər tii waadidiliib pu na*

<sup>1</sup> Yesu aah len kina na, le u waan lik paacham, ki bui ke, “Nte Uwumbər, n-yoonn fuu ni a. Nyuɲ min Aajapəɲn, le m mu nyuɲ si Nte; <sup>2</sup> ba pu? aa ɲa mi binib məmək Aadindaan ke m di liməfal li kaa kpa ndoon na, ki di tii saah tii mi binib bi na məmək. <sup>3</sup> Sin baanja le ye Uwumbər bamənn. Binib bi nyi si, ki nyi mi Yesu Kristo u aa tun ni u na, bima le kpa liməfal li kaa kpa ndoon na. <sup>4</sup> M nyuɲ si dulnyaa wee ni; m tun saah tii mi lituln li na ki doo. <sup>5</sup> Nte Uwumbər, dulnyaa aah kaa nan kee bi buyoonn na, m nan bi aa chee, le aa nyuɲ mi. Nte, ki nyuɲ mi kina aa chee.

<sup>6</sup> “M mək bijab bimina saah bi pu na. Aa nyan bi dulnyaa ni aanib ponn ni ki di tii mi la. Bi nan ye saanib la, le aa di bi tii mi, le bi joo saaliin.

<sup>7</sup> Dandana bi bee ke saah tii mi tiwan nimək na, ni nyan ni aa chee la; <sup>8</sup> ba pu? m tuk bi saah tuk mi tibər ti na, le bi gaa ti, ki nyi ke ni ye mbamən ke m nyan ni aa chee, ki pak ke si le tun ni mi.

<sup>9</sup> “M mee si tii bi. Maa mee si tii dulnyaa aanib. M mee si tii binib bi aa tii mi na la; ba pu? bi ye saanib la. <sup>10</sup> Maanib məmək ye saanib la. Le saanib mu ye maanib. Le bi nyuŋ mi. <sup>11</sup> Dandana, m choo aa chee la. Maan ki li bi dulnyaa ni; bima le ga li bi dulnyaa ni. Nte Uwumbər u ye chain na, aa tii mi saayimbil. Cha liyimbil ngbaan aapəən li lik bi, bi li ye unibaan ke m ni si aah ye unibaan pu na. <sup>12</sup> Maah bi bi chee buyoonn na, m lik bi saayimbil li aa tii mi na aapəən pu la. M lik bi, le bi ponn ni ubaa aa bee yəli, see nifam na baanja. Waah bee fam na, ni gbiin Uwumbər Aagban aah len pu na. <sup>13</sup> Dandana m choo aa chee la. Maah laa bi dulnyaa ni na, nima le m len aa chee tibər timina ke bi li kpa mpopiin ke maah kpa pu na. <sup>14</sup> M tuk bi saaliin. Maah kaa ye dulnyaa yoo na, kina le bi mu aa ye dulnyaa yaab. Nima le cha dulnyaa aanib nan bi. <sup>15</sup> Maa mee si ke aa nyan bi dulnyaa ni. M mee si ke aa taa cha kinimbəŋ ŋa bi nibaa. <sup>16</sup> Maah kaa ye dulnyaa yoo na, kina le bi mu aa ye dulnyaa yaab. <sup>17</sup> Ŋa bi chain. Cha saaliin i ye mbamən na ŋa bi chain. <sup>18</sup> Saah tun ni mi dulnyaa wee ni pu na, kina le m mu tun bi dulnyaa ni. <sup>19</sup> Bi pu le m di mbaa tii si ke bi mu li ye saanib bi bi chain mbamən na.

<sup>20</sup> “Maa mee si tii bijab bimina baanja. M mee si tii binib bi ga gaa mi ki kii baaliin pu na la. <sup>21</sup> M mee si ke bi məmək li ye unibaan. Nte Uwumbər,

aa bi m ni, le m mu bi aa ni. Cha bi mu li bi ti ni, aan dulnyaa ni aanib pak ke aa sil tun ni mi. <sup>22</sup> Saah tii mi saabimbinyaan pu na, kina le m mu tii bi, aan bi li ye unibaan ke m ni si aah ye unibaan pu na. <sup>23</sup> M bi bi ni, le aa mu bi m ni, ke bi kpaan unibaan mbamɔm, aan dulnyaa ni aanib bee ke aa tun ni mi, ki bee ke aa gee saanib ke saah gee mi pu na.

<sup>24</sup> “Nte Uwumbɔr, saah tii mi binib bi na, m ban bi mu li bi maah bi nin chee na, ki kan saah nyun mi pu na; saah kaa nan kee naan dulnyaa buyoonn na, aa nan gee mi. <sup>25</sup> Nte Uwumbɔr u ŋani ni ŋan na, dulnyaa aanib aa nyi si. Min le nyi si. Binib bimina mu bee ke aa tun ni mi la. <sup>26</sup> M mɔk bi saah bi pu na, ki ga li beenin mɔk bi, ke bi mu li gee tɔb ke saah gee mi pu na, aan m mu li bi bi ni.”

## 18

### *Baah chuu Yesu pu na*

*(Matiu 26.47-56; Mak 14.43-50; Luk 22.47-53)*

<sup>1</sup> Yesu aah len kina ki ti doo na, le u ni waadidiliib puur nkpen mu bi yin mu ke Kidronn na. Isui i lu ŋisubil jikee na aasaak kibaa bi nima chee. Le bi koo kisaak ngbaan ni. <sup>2</sup> Le Judas, u ga kooh Yesu na, mu nyi nima chee; Yesu ni waadidiliib nan kuuni nima chee kpala kpala. <sup>3</sup> Le Judas nan di butɔb aajab ni bitutum bi nyan ni Uwumbɔr aatotoorninkpiib ni Farisii yaab chee na, ki buen kisaak ngbaan ni bi ti chuu Yesu. Bi nan joo ni karyaamam, ni tijawan. <sup>4</sup> Le Yesu nyi budabu ga ŋa u na. Le u tooh bi nsan ni, le ki ti baa bi, “Ni ban ŋma?”

<sup>5</sup> Le bi bui u, “Ti ban Yesu u ye Nasaref aatin aanii na la.”

Le u bui bi, “Min ye.”

Judas u kooch u na mu nan si butəb aajab ngbaan chee. <sup>6</sup> Yesu aah len ke uma ye na, le bi sur puwəb, ki lir kitin. <sup>7</sup> Nima le u ki baa bi, “Ni ban ηma?”

Le bi bui ke, “Yesu u ye Nasaref aatin aanii na.”

<sup>8</sup> Le u bui bi, “M tuk nimi ke min ye. Ni yaa ban mi kan, ni cha maadidiliib na li cha.” <sup>9</sup> U len kina ke ni gbiin waah len pu na, ke Uwumbər aah tii u binib bi na, waa cha bi ponn ni ubaa bee fam.

<sup>10</sup> Le Simonn Piita joo kijaak aajuk, le ki di gaa per Uwumbər aatotoorninkpel aanaagbiija aatafagiir. Bi yin unaagbiija ngbaan ke Malkus.

<sup>11</sup> Le Yesu bui Piita, “Di saajuk ngbaan fu kijuchook ni. M taa ji falaa u Nte Uwumbər siin mi na aa?”

### *Baah di Yesu buen uninkpel Anas chee pu na*

<sup>12</sup> Le butəb aajab, ni baaninkpel, ni bitutum ngbaan chuu Yesu ki buu uŋaal, <sup>13</sup> le ki pue di u buen Anas chee. Anas nan ye Kayafas aachool la. Kayafas nan ye Uwumbər aatotoorninkpel le libiln ngbaan, <sup>14</sup> ki ye uja u nan tuk Juu yaab ke ni ŋan ke unibaan kpo binib məmək pu na.

### *Piita aah nee Yesu pu na*

*(Matiu 26.69-70; Mak 14.66-68; Luk 22.55-57)*

<sup>15</sup> Baah di Yesu buen na, le Simonn Piita ni Yesu aadidiir ubaa paan u pu. Uwumbər aatotoorninkpel nyi Yesu aadidiir ngbaan. Nima le u dii Yesu ki koo ni Uwumbər aatotoorninkpel aachiln ni. <sup>16</sup> Le Piita nan sil mbisaməb chee lipaal. Le Yesu aadidiir u Uwumbər aatotoorninkpel nyi u na buen ti len usapəon u si kii mbisaməb na chee, le ki di Piita koo ni.



17 Le usapɔɔn ngbaan baa Piita, “Aa mu ye uja ngbaan aadidiir ubaa la aa?”

Le u bui u, “Maa ye.”

18 Tiwoor nan bi. Le Uwumbɔr aatotoorninkpel aatutum, ni Juu yaab aatutum nan di nkoon tuur mmii, ki si wol. Le Piita mu si bi chee, ki si wol mmii.

*Uwumbɔr aatotoorninkpel aah jin Yesu tibɔr pu na*

*(Matiu 26.59-66; Mak 14.55-64; Luk 22.66-71)*

19 Le Uwumbɔr aatotoorninkpel baa Yesu waa-didiliib aabɔr, ki baa u waah mɔk binib pu na aabɔr. 20 Le Yesu bui u, “N-yoonn mɔmɔk, le m len binib mɔmɔk aanimbil ni, ki tuk bi Uwumbɔr aaliin, mmeen aadir ni, ni Uwumbɔr Aadichal ni, Juu yaab mɔmɔk aah kuuni nin chee na. Maa len tibɔr tibaa libɔɔl ni. 21 Ba ɲa aa baa mi? Baa binib bi ɲun maah len pu na ke m tuk bi kinye. Bi nyi maah len pu na.”

22 Yesu aah len kina na, le ututunn u si u chee na di uɲaal faa u, le ki baa u, “Uwumbɔr aatotoorninkpel chee le aa len kina aa?”

23 Le Yesu bui u, “M yaa len tibɔbir kan, mɔk binib ngbaan taah bir pu na. Maah len pu na yaa ɲan kan, ba ɲa aa faa mi?”

24 Le Anas di Yesu tun Kayafas u ye Uwumbɔr aatotoorninkpel na chee. Tikululn beenin buu uɲaal.

*Piita aah ki nee Yesu pu na*

*(Matiu 26.71-75; Mak 14.69-72; Luk 22.58-62)*

25 Simonn Piita aah si wol mmii pu na, le bi baa u, “Aa mu ye waadidiliib ponn ni ubaa la aa?”

Le u nee ki bui ke waa ye.

26 Le Uwumbør aatotoorninkpel aanaagbiib ponn ni ubaa, u ye uja u Piita gaa per utafal na aana aabo ubaa na, baa u, “Maa ba kan si Yesu chee kisaak ngbaan ni ii?”

27 Le Piita ki nee. Libuul ngbaan ni le ukooja wii.

*Pailat aah jin Yesu tibør pu na*

*(Matiu 27.1-2, 11-14; Mak 15.1-5; Luk 23.1-5)*

28 Le bi di Yesu nyan Kayafas aadichal ni, ki di u buen kitiņ ngbaan aaninkpel aadichal ni, bi yin u ke Pailat. Ni nan ye lichakpitaawoln la. Juu yaab aaninkpiib nan ban ke bi li bi chain ki ji Lakr-jer aajim,\* nima le baa nan koo ni lidichal ngbaan ni.

29 Nima pu le Pailat nyan lipaal bi chee, ki ti baa bi, “Ni galn uja ngbaan kinye?”

30 Le bi bui u, “Uja ngbaan yaa kaa ba ye bakadaan kan, taa ba ga chuu u ŋa aanjaal ni.”

31 Le Pailat bui bi, “Nimi nibaa gaa u ki ti ji u tibør, nimi aakaal aah dii pu na.”

Le bi bui u, “Taa kpa nsan ti ku unii.” 32 Baah len kina na, ni gbiin Yesu aah nan len pu ki mək binib waah ga nan kpo pu na.

33 Le Pailat ki labr koo lidichal na ni, le ki yin Yesu, ki nan baa u, “Sin le ye Juu yaab aabør aa?”

34 Le Yesu baa u, “Saah len pu na, aa len aabaa pu le aan binib le tuk si ke m ye Juu yaab aabør.”

35 Le Pailat baa u, “M ye Juu yaab aanii la aa? Sin aabaa aanib ni Uwumbør aatotoorninkpiib le di si ŋa ŋjaal ni. Aa ŋa ba?”

---

\* **18:28** : Israel yaab nan ji Lakr-jer aajim ke bi teer buyoonn Uwumbør nan nyan bi tinaagbiir ni, Ijipt aatiņ ni na. Lik Nnyam 12.1-27.

<sup>36</sup> Le Yesu bui u, “Maanaan aa ye dulnyaa wee ni aanaan. Maanaan yaa ba ye dulnyaa wee ni aanaan kan, maadidiliib ba ga jan kijaak, Juu yaab taa nmaa chuu mi. Maanaan aa ye dulnyaa wee ni aanaan.”

<sup>37</sup> Le Pailat baa u, “Aa sil ye ubər la aa?”

Le Yesu bui u, “Ni ye saah len pu na. M dan dulnyaa wee ni ke m nan tuk binib mbamən la. Nima le cha bi ma mi. Unii umək ban mbamən na kan, u ga kii maah len pu na.”

<sup>38</sup> Le Pailat baa u, “Mbamən ye kinye?”

*Baah len ke bi ga ku Yesu pu na*

*(Matiu 27.15-31; Mak 15.6-20; Luk 23.13-25)*

Pailat aah len kina na, le u ki nyan lipaal Juu yaab chee, ki ti bui bi, “Maa kan waataani ubaa.

<sup>39</sup> Nimi aakaal le ye ke m nyan unaagbiija ubaa lii Lakr-jer aajim yoonn. Ni ban ke m di Yesu, u ye Juu yaab Aabər na lii ii?”

<sup>40</sup> Le bi teen, “Taa di uja ngbaan lii. Di Barabas lii.” Barabas nan ye ufifir la.

## 19

<sup>1</sup> Le Pailat di Yesu n̄a waatəb aajab aajaal ni ke bi lue u n̄inaalab. <sup>2</sup> Le bi luu ikokon aayikpupuk ki di chin̄ u, ki di libəkumaln̄ peen u, <sup>3</sup> le ki choo ki nan dooni u, ki bui u, “Juu yaab Aabər, aa doon aa?” le ki joo bin̄aal gbaa u.

<sup>4</sup> Le Pailat ki nyan lipaal, ki ti bui Juu yaab, “M ga di u nyan ni lipaal ni chee, aan ni bee ke maa kan waataani ubaa.” <sup>5</sup> Le Yesu nyan ni lipaal, ki beenin chik ikokon aayikpupuk ki pee libəkumaln̄ ngbaan. Le Pailat bui bi, “Lik man, uja ngbaan s̄ə.”

<sup>6</sup> Uwumbɔr aatotoorninkpiib ni baatutum aah kan u na, le bi teen ke, “Kpaa u ndɔpuinkoo pu, kpaa u ndɔpuinkoo pu.”

Le Pailat bui bi, “Nimi nibaa kpaa u ndɔpuinkoo pu man. Maa kan waataani ubaa.”

<sup>7</sup> Le bi bui u, “Ti kpa nkaal la. Nkaal ngbaan aah dii pu na, u ɲeer nkun; ba pu? u len ke u ye Uwumbɔr Aajapɔɔn la.”

<sup>8</sup> Pailat aah ɲun ke Yesu bui ke u ye Uwumbɔr Aajapɔɔn na, le ijawaan moo chuu u. <sup>9</sup> Le u ki gir koo lidichal ngbaan ni, ki ti baa Yesu, “Aa nyan ni la chee?”

Le Yesu aa len tibaa. <sup>10</sup> Le Pailat baa u, “Saan gar mi tibaa aa? Li nyi. M kpa mpɔɔn, ki ga ɲmaa di si lii, ki kpa mpɔɔn ki ga ɲmaa kpaa si ndɔpuinkoo pu.”

<sup>11</sup> Le Yesu bui u, “Uwumbɔr yaa kaa tii si mpɔɔn kan, saan ɲmaa li kpa mpɔɔn ki ɲa mi nibaa. Nima pu na, unii u di mi ɲa aarjaal ni na, waatunwanbir jer siyaan.”

<sup>12</sup> Waah len kina na, nima le Pailat ban ke u di u lii; le Juu yaab teen ke, “Aa yaa di uja ngbaan lii kan, saa ye Ubɔrkpaan Siisa aajo; unii umɔk len ke u ye ubɔr na, u ye Siisa aadin la.”

<sup>13</sup> Pailat aah ɲun kina na, le u ki nyan Yesu lipaal ki ti kal ubɔjir aajal pu, bi yin nima chee ke “Ntakpateer paab.” Juu yaab aaliin ponn ni, bi yin nima chee ke “Gabata.” <sup>14</sup> Ni nan ye Lakr-jer aajim yoonn la. Liyaadaal ngbaan nan ye kitaak ki ga ji ki woln Juu yaab aakpaakool daal na la. Ni nan ye kichakpiik ni, ki naahn tikur tiloob yoonn. Le Pailat bui Juu yaab, “Lik man, nimi aabɔr sɔ.”

<sup>15</sup> Le bi teen, “Nyan u nima, nyan u nima, kpaa u ndɔpuinkoo pu.”

Le Pailat baa bi, “M di nimi aabɔr kpaa ndɔpuinkoo pu uu?”

Le Uwumbɔr aatotoorninkpiib bui u, “Taa ki kpa ubɔr ubaa ki kpee Siisa pu.”

<sup>16</sup> Baah len kina na, le u di Yesu ŋa biŋaal ni, bi ti kpaa u ndɔpuinkoo pu.

*Baah kpaa Yesu ndɔpuinkoo pu pu na  
(Matiu 27.32-44; Mak 15.21-32; Luk 23.26-43)*

Le bi gaa u, <sup>17</sup> ki cha u yoor waadɔpuinkoo, le bi di u nyan kitiŋ ponn ni, ki buen nibaa chee, bi yin nima chee ke “Kiyikpanj aapepel.” Juu yaab aaliin ponn ni, bi yin nima chee ke “Golgota.” <sup>18</sup> Le butɔb aajab ngbaan kpaa u ndɔpuinkoo pu nima chee, le ki kpaa bijab bilee mu idɔpuinkee pu. Bi kpaa ubaa unjangan wɔb, ki kpaa uken unjanguu wɔb. Le Yesu nan bi bikaasisik ni. <sup>19</sup> Pailat nan ŋmee ŋŋmeen ke, “Yesu u ye Nasaref aatiŋ aanii, ki ye Juu yaab Aabɔr na,” le ki di ŋŋmeen ngbaan tam waadɔpuinkoo pu. <sup>20</sup> Ni ŋmee Juu yaab aaliin ponn ni, ni Rom yaab aaliin ponn ni, ni Griik yaab aaliin ponn ni. Baah nan kpaa Yesu ndɔpuinkoo pu nin chee na aa daa kitiŋ ni, nima pu na, Juu yaab pam le nan karn ŋŋmeen ngbaan. <sup>21</sup> Le Juu yaab aatotoorninkpiib bui Pailat, “Taa ŋmee ke u ye Juu yaab Aabɔr. Ŋmeen ke uma le len ke u ye Juu yaab Aabɔr.”

<sup>22</sup> Le Pailat bui bi, “Maah ŋmee pu na, ni ŋmee a.”

<sup>23</sup> Le butɔb aajab bi kpaa u ndɔpuinkoo pu na yakr waawanpeenkaan nfum munaa, bima binib binaa; le ki yoor waakpalk mu. Kikpalk ngbaan

nan ye litamuln, kaa kpa baah ηal nin chee na.  
 24 Nima pu le bi bui tɔb, “Taa cha ti kar kikpalk  
 ngbaan. Cha ti too inaan, ki lik ke ulau ga ji ki.”  
 Baah ηa pu na, ni gbiin Uwumbɔr Aagban aah len  
 pu na ke:

“Bi di maawanpeenkaan yakr tii tɔb,  
 ki too inaan maakpalk pu.”\*

Nima le cha butɔb aajab ngbaan ηa kina.

25 Le Yesu aana, ni unawaa, ni Mari u ye Klopas  
 aapuu na, ni Mari Magdalene, nan si gbɔk Yesu  
 aadɔpuinkoo. 26 Le Yesu kan una ni waadidiir u u  
 gee u na si gbɔk u. Le u bui una, “Nna, lik, aajapɔɔn  
 sɔ,” 27 le ki bui waadidiir ngbaan mu, “Lik, aana  
 sɔ.” Liyaadaal ngbaan, le uidiir ngbaan di Yesu  
 aana koon waachiln ni.

*Yesu aah kpo pu na*

*(Matiu 27.45-56; Mak 15.33-41; Luk 23.44-49)*

28 Le Yesu bee ke u tun waatuln doo a. Le u bui  
 ke, “Nnyunyuu chuu mi.” Waah len kina na, ni  
 gbiin Uwumbɔr Aagban aah len pu na.

29 Le tiwanyukaan ni mɔɔn na gbii lisambil ki si  
 nima chee. Le bi di nkiisuk bɔn ni ni, ki di ηa ndɔ  
 pu, ki di ηa umɔb ni ke u moor. 30 Waah moor ni  
 na, le u bui ke, “Maatuln doo a,” le ki gaa tiin, ki  
 cha waawiin nyan, le u kpo.

*Baah saa Yesu aasikakl pu na*

31 Ni nan ye kitaak ki ga woln Juu yaab aafuur  
 daal na la. Likpaakool daal ngbaan nan ye nwiin  
 sakpiin daal la. Nima le Juu yaab aa ban ke ηinikpol  
 li beenin bi idɔpuinkee pu likpaakool daal. Nima  
 le bi bui Pailat ke u cha waajab ti gbaa kool bitaa,

---

\* 19:24 : Lik Ilahn 22.18.

aan bi kpo mala, aan bi chuu nyan bi idɔpuinkee pu. <sup>32</sup> Le waajab dan nan gbaa kool bijab bi lee idɔpuinkee pu Yesu chee na aataa. Bi gbaa kool ubaa aataa, ki ti gbaa koo uken mu aataa. <sup>33</sup> Baah ti fuu Yesu chee na, bi mui u kpo a, nima le baa gbaa kool utaa. <sup>34</sup> Le butɔb aaja ubaa di kigbalk saa Yesu aasikakl. Libuul ngbaan ni, le nsin ni nnyun nyan. <sup>35</sup> Uja u kan kina na tuk binib waah kan pu na, aan ni mu tii naadii. Waah len pu na, ti gbii. U nyi ke u len mbamɔn la. <sup>36</sup> Bi ŋa Yesu kina ke ni gbiin Uwumbɔr Aagbanj aah len pu na ke, “Waakpab ponn ni libaa aan koo.”† <sup>37</sup> Uwumbɔr Aagbanj ki len ke, “Bi ga lik uja u bi saa u na.”‡

*Baah sub Yesu pu na*

*(Matu 27.57-61; Mak 15.42-47; Luk 23.50-56)*

<sup>38</sup> Tɔ, Josef, u nan ye Arimatea aatiŋ aanii na, mu nan bi nima. U nan ye unii u dii Yesu na, ki mu san Juu yaab ijawaan, kaa cha binib nyi. Uja ngbaan nan buen ti mee Pailat ke u cha u nyan Yesu aawon ndɔpuinkoo pu. Le Pailat kii. Le u buen ti nyan u ndɔpuinkoo pu. <sup>39</sup> Nikodemus, u nan dan Yesu chee njan kinyeek na, mu nan fuu ni, ki joo ni tulalee. Ni nan ye tulalee u bi yin u ke mir na, ni tulalee u bi yin u ke alos na, aan bi di ŋmal tɔb ni la. Tulalee ngbaan aanyunyuun ga pii bɔtɔmɔn. <sup>40</sup> Le bi di likekenyaan ni tulalee ngbaan poo Yesu aawon. Juu yaab yaa ban bi sub linikpol kan, bi ŋani kina la. <sup>41</sup> Baah kpaa Yesu nin chee na, ŋisubil aasui aasaak kibaa nan bi nima. Bi nan gbii kitakpaluŋ kibaa nima chee. Baa nan kee sub

---

† 19:36 : Lik Nnyam 12.46; Nkahn 9.12; Ilahn 34.20. ‡ 19:37 : Lik Sekaria 12.10.

unii ubaa ki ponn ni. <sup>42</sup> Kitakpalun ngbaan aah kaa daa nima chee na, le bi di Yesu aawon ti sub ki ponn ni. Ni nan ye kitaak ki ga woln Juu yaab aakpaakool daal na la.

## 20

*Yesu aa ki bi likaakul na ni  
(Matiu 28.1-8; Mak 16.1-8; Luk 24.1-12)*

<sup>1</sup> Juu yaab aakpaakool daal aah jin ki woln kitaak na, le Mari Magdalene buen likaakul ngbaan chee. Ni nan ye lichakpitaawoln, ki laa boon. Waah ti fuu likaakul chee na, le u kan ke litakpal li bi nan di len likaakul aamob na, aa ki bi. <sup>2</sup> Le u san buen Simonn Piita ni Yesu aadidiir uken u Yesu gee u na chee, le ki ti bui bi, “Bi nyan Tidindaan aawon likaakul ni a. Taa nyi baah di ti na nin chee na.”

<sup>3</sup> Le Piita ni Yesu aadidiir uken ngbaan fi san buen likaakul ngbaan chee. <sup>4</sup> Le Yesu aadidiir uken ngbaan san jer Piita ki puen fuu li chee, <sup>5</sup> le ki ti boon ki gbuun lik, ki mui njikeken ngbaan le do. Waa koo likaakul na ni. <sup>6</sup> Le Simonn Piita, u paan ni puwob na mu fuu ni, le ki koo likaakul na ni, ki mui njikeken ngbaan do. <sup>7</sup> U mui likekeln li bi nan di poo uyil na kpab, ki do libaa. <sup>8</sup> Le Yesu aadidiir u puen fuu ni likaakul chee na mu koo, ki kan, le ki tii naadii. <sup>9</sup> Baa nan kee bee Uwumbor Aagban aah len pu na aatataa, ke Yesu ga fikr nkun ni. <sup>10</sup> Le bi gir kun.

*Yesu aah di ubaa mak Mari Magdalene pu na  
(Matiu 28.9-10; Mak 16.9-11)*

<sup>11</sup> To, Mari nan beenin si likaakul na chee ki wii. Waah si wii na, le u boon ki gbuun lik li ponn



ni, <sup>12</sup> le ki kan Uwumbɔr aatuuntiib bilee bi pee tiwanpiln na ka Yesu aawon aah ba dɔ nin chee na. Ubaa nan ka uyil aah ba bi ni wɔb na, le uken mu ka utaa aah ba bi ni wɔb na. <sup>13</sup> Le bi baa u, “Upii, ba ŋa si aa wii?”

Le u bui bi, “Bi nyan Ndindaan aawon la. Maa nyi baah di ti ŋa nin chee na.”

<sup>14</sup> Waah len kina na, le u fenn lik upuwɔb, ki mui Yesu si, kaa nyi ke Yesu ye. <sup>15</sup> Le Yesu baa u, “Upii, ba ŋa si aa wii? Aa ban ŋma?”

Mari nan nyi ke uja u kii kisaak na ye. Le u bui u, “Maaninkpel, aa yaa di waawon ŋa nin chee na kan, mɔk mi, m ti yoor.”

<sup>16</sup> Le Yesu bui u ke, “Mari.”

Le u fenn, ki bui u Juu yaab aaliin ni ke, “Raboni.” Naatataa le ye ke “Umɔmɔkr.”

<sup>17</sup> Le Yesu bui u, “Taa meeh mi. Maa kee buen paacham, Nte Uwumbɔr chee. Li cha ki ti tuk nnaabitiib ke m cha paacham, Nte u ye Maawumbɔr na chee la, u ye ni mu Aate, ki ye ni mu Aawumbɔr na.”

<sup>18</sup> Le Mari Magdalene buen ti tuk bi, “M kan Tidindaan a,” le ki tuk bi Yesu aah tuk u tibɔr ti na.

*Yesu aah di ubaa mɔk waadidiliib pu na*

*(Matiu 28.16-20; Mak 16.14-18; Luk 24.36-49)*

<sup>19</sup> Tɔ, Juu yaab aakpaakool daal aah jin ki woln kitaak na aajook le Yesu aadidiliib bi kidiik ni, ki lan; ba pu? bi nan san Juu yaab ijawaan. Le Yesu dan nan sil bikaasisik ni, le ki bui bi, “Ni li kpa nsuudoon man.” <sup>20</sup> Waah len kina na, le u taln unɔal ki mɔk bi baah nan kpaa unɔal ponn ni ipiin pu na, le ki mɔk bi baah nan saa usikakl kigbalk pu na. Waadidiliib aah kan u na, le bi kpa mpopiin

pam. <sup>21</sup> Le u ki bui bi, “Ni li kpa nsuudoon man. Nte Uwumbør aah tun ni mi pu na, kina le m mu tun nimi.” <sup>22</sup> Waah len kina na, le u fuur lii bi pu, le ki bui bi, “Gaa Uwumbør Aafuur Nyaan man. <sup>23</sup> Ni yaa di cha pinn binib baatunwanbir kan, bi ga kan chapinn. Ni yaa kaa di cha pinn bi kan, baan kan chapinn.”

*Yesu aah tuk Tomas pu na*

<sup>24</sup> Tomas, u bi yin u ke Kijaan, aan u ye Yesu aadidiliib kipiik ni bilee ponn ni ubaa na, aa nan bi bikaasisik ni buyoonn Yesu dan na. <sup>25</sup> Le Yesu aadidiliib biken tuk u, “Ti kan Tidindaan a.”

Le u bui bi, “M yaa kaa kan baah nan kpa uŋaal ponn ni ipiin pu na aabue, ki di ŋŋanbik baan ŋjibue ngbaan ponn ni, ki di ŋŋaal baan baah nan saa usikakl kigbalk pu na aabuer ponn ni kan, maan pak naah len pu na.”

<sup>26</sup> Tɔ, le iwiin iniin jer. Le Yesu aadidiliib nan ki bi kidiik ni. Tomas mu nan bi bi chee. Bi nan lan kidiik a. Le Yesu dan nan sil bikaasisik ni, le ki bui ke, “Ni li kpa nsuudoon man,” <sup>27</sup> le ki bui Tomas, “Di aanŋanbik baan ŋŋaal aabue ponn ni, ki di aanŋaal baan nsikakl aabuer mu ponn ni, aan ki gaa mi ki kii, aan ki taa ki beeni.”

<sup>28</sup> Tomas nan bui u, “Aa ye Ndindaan ni Maawumbør la.”

<sup>29</sup> Le Yesu bui u, “Saah kan mi na le aa gaa mi ki kii. Uwumbør aanyoor bi binib bi kaa kan mi aan ki gaa mi ki kii na pu.”

*Nitaa ŋi pu bi ŋmee kigbanj kee na*

<sup>30</sup> Tɔ, Yesu nan tun lijinjir aatun ŋiken pam waa-didiliib aanimbil ni. Ni mɔmɔk mu aa bi kigbanj

kee ni. <sup>31</sup> Bi ηmee nimina ke ni pak ke Yesu le ye Kristo u gaa timi lii na, ki ye Uwumbər Aajapəən. Ni yaa gaa u ki kii kan, u pu le ni ga li kpa liməfal.

## 21

### *Yesu aah ki di ubaa mək waadidiliib pu na*

<sup>1</sup> Nee aapuwəb le Yesu di ubaa mək waadidiliib nnyusakpem chee, bi yin mu ke Tiberias (ki ki yin mu ke Galilee). Kina le u nan di ubaa mək bi. <sup>2</sup> Simonn Piita ni Tomas u bi yin u ke Kijaan na, ni Natanael u nyan ni Kana aatinj ki bi Galilee aatinj ni na, ni Sebedee aajapətiib bilee na, ni Yesu aadidiliib bilee biken nan bi təb chee. <sup>3</sup> N-yoonn ngbaan le Simonn Piita bui bi, “M cha m ti chur ijan la.”

Le bi bui u, “Ti mu ga dii si.” Le bi buen ti koo buŋəb ni, ni di ti woln, baa kan nibaa.

<sup>4</sup> Nwiin aah laa puu ni na, le Yesu sil nnyun aagbaan. Bididiliib ngbaan aa nan nyi ke Yesu ye.

<sup>5</sup> Le u baa bi, “Binachipəm, naa kan ijan aa?”

Le bi bui u, “Taa kan.”

<sup>6</sup> Le u bui bi, “Di kipəək ngbaan di mee buŋəb aanjängii wəb man, le ni ga kan.” Le bi mee ki chuu ijan pam, le kaa ηmaa yoor.

<sup>7</sup> Le Yesu aadidiir u Yesu gee u na bui Piita, “Tidindaan ye.” Baah nan bi ban ijan na, bi nan yii ηikpatambinn baanja la. Simonn Piita aah ηun ke Tidindaan ye na, le u yoor waabəkul ki di peen, le ki lir nnyun ni ki cha u chee. <sup>8</sup> Waadidiliib bi gur na nan bi buŋəb ngbaan ni ki dar kipəək ki gbii ijan na, ki choo nnyun aagbaan. Nnyun aagbaan aa nan daa. Ni naahn ηisaŋ ikui ilee la. <sup>9</sup> Baah ti fuu

nnyun aagbaan ki nyan buɲɔb ni na, bi mui nkoon aamii bi, ujan pu mu ni, le boroboro mu bi. <sup>10</sup> Le Yesu bui bi, “Li joo ni naah chuu ijan i na ngem.”

<sup>11</sup> Le Simonn Piita ki koo buɲɔb na ni ki ti gbiln kipɔɔk na, ki joo dar cha n-gbaan. Kipɔɔk ngbaan nan gbii ijan sakpiin. Ijan ngbaan nan ye nkub ni piɲmu ni itaa. Yaah po wiir kina na, kipɔɔk ngbaan aa nan kar. <sup>12</sup> Le Yesu bui bi, “Dan nan ji man.” Waadidiir ubaa aa nan kaa u baa u, “Si ɲma ye?” ba pu? bi nyi ke Tidindaan ye. <sup>13</sup> Le Yesu dan nan yoor boroboro ni ijan ki di tii bi.

<sup>14</sup> Yesu aah nan fikr nkun ni ki joo ubaa mɔk waadidiliib na, nimina le nan ɲa taataa.

### *Yesu aah tuk Piita pu na*

<sup>15</sup> Baah jin tijikaar ngbaan doo na, le Yesu baa Simonn Piita, “Simonn, Jɔnn aajapɔɔn, aa gee mi ki jer tiwan nimina aa?”

Le u bui u, “Ndindaan, een, aa nyi ke m gee si.”

Le Yesu bui u, “Kpiin maapihbi,” <sup>16</sup> le ki ki baa u lelee, “Simonn, Jɔnn aajapɔɔn, aa gee mi ii?”

Le u ki bui u, “Ndindaan, een, aa nyi ke m gee si la.”

Le Yesu bui u, “Li kii maapiih,” <sup>17</sup> le ki ki baa u taataa, “Simonn, Jɔnn aajapɔɔn, aa gee mi ii?”

Le Simonn Piita aasui bii; ba pu? u nan baa u nfum mutaa mɔk, “Aa gee mi ii?” Le u bui u, “Ndindaan, aa nyi tiwan mɔmɔk. Aa nyi ke m gee si.”

Le Yesu bui u, “Kpiin maapiih. <sup>18</sup> M tuk si mbamɔn la, saah nan ye unachipɔɔn na, aa nan peeni saawanpeenkaan, ki chaa saah gee nin chee na. Aa yaa ti por kan, aa ga taln aajaal, unii ubaa

le ga peen si, ki yoor si buen saah kaa gee nin chee na.” <sup>19</sup> U nan bui Piita kina ke u mək u, uma Piita aah ga kpo ki nyunj Uwumbər pu na. Waah len kina na, le u bui u, “Li dii mi.”

<sup>20</sup> Le Piita fenn upuwəb, ki kan Yesu aah gee waadidiir u na paa ni bi pu. Waadidiir ngbaan ye unii u nan foor duun Yesu, baah nan bi ji tijiir buyoonn na, ki nan baa u ke, “Ndindaan, ɲma ga kooh si?” na. <sup>21</sup> Piita aah kan u paani bipuwəb na, le u baa Yesu, “Ndindaan, ba ga ɲa uja wee?”

<sup>22</sup> Le Yesu bui u, “M yaa gee ke u li bi ki nan saa buyoonn m ga nan gir ni na kan, ti ye saabər aa? Li dii mi.”

<sup>23</sup> Nima le Yesu aanib bui ke waadidiir ngbaan aan kpo. Yesu ma aa bui ke waan kpo, u po bui le ke, “M yaa gee ke u li bi ki nan saa buyoonn m ga nan gir ni na kan, ti ye saabər aa?”

<sup>24</sup> Waadidiir ngbaan le ye unii u tuk binib tibər tee, ki ɲmee ti kigbanj kee ni na. Ti bee ke waah len pu na gbii.

<sup>25</sup> Tiwan pam aabəŋ le Yesu ɲa, bi mu aa ɲmee ni məmək. Bi yaa ba ɲmee ni məmək kan, maa dak ke bi ba ga kan mpaan dulnyaa ni ki bil baah ɲmee tigbann ti na.

## **Uwumbor aagban Bible without Deuterocanon in Konkomba**

copyright © 2014 Wycliffe Bible Translators, Inc.

Language: Konkomba

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The Bible without Deuterocanon**

in Konkomba

**© 2014, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 11 Nov 2022 from source files  
dated 29 Jan 2022

c7765cba-ce13-51c8-80b3-68fach5fdf4a